


特 別
A18
4892
17





八18
4892
17

明詩綜卷四十六


小長蘆 朱彝尊 錄

武陵 胡期真 緝評

李攀龍 十八首

攀龍字于麟歷城人嘉靖甲辰進士除刑部主
事歷郎中出知順德府升陝西提學副使轉參
政終河南按察使與王世貞謝榛梁有譽宗臣
徐中行吳國倫稱七才子有滄溟集

特出誠天開之逸足藝場之上匠也 穆敬甫云于麟構思玄遠造語
精深如蒼崖古壁周鼎商彝奇氣自不可掩 顧玄言云觀察七言律
函思英發裝調豪邁如八音鳳奏五色龍章開闔鏗鏘可稱絕美至五
言似有不盡然者 王元美云李于麟如峨嵋積雪閨風蒸霞高華氣
色罕見其比又如大商舶明珠異寶貴堪敵國下者亦是木難火齊又
云七言律詩至仲默而暢獻吉而大于麟而高 王敬美云于麟七律



明詩綜卷四十六

俊潔響亮海內爭事剽竊至使人厭 彭子殷云于鱗樂府思上薄漢
魏而病於襲七律高華絕響之中不免著迹 屠緯真云元美推尊于
鱗誠過當時諸公揮毫或未免纖弱于鱗晚出蒼健驚人奈何不壓倒
曹耦今若盡讀于鱗詩初則喜其雄俊多則厭其雷同若雜一首於眾
作之中則陡覺矯壯而突出矣宜其為元美賞詒如此也 王承父云
詩衰於宋元北地起而復古一代摹擬之格此則創矣歷下一變鑽鍊
陶沈脫凡腐而尚精麗然才情聲律未極變化故用豪句構壯字自高
或晦而雜疊復而致厭始多宗之後且避之也 胡元瑞云獻吉學杜
步趨形骸登善之墓蘭亭也于鱗擬古割裂鉅釘懷仁之集聖教也必
如獻吉歌行于鱗七律斯為雙鷗並運各極摩天之勢又云于鱗七律
高華傑起一代宗風而用字多同十篇而外不耐多讀又云仲默為大
家不足于鱗為名家有餘 李時遠云滄溟七律誠佳至於擬古雖無
作可也 孫文融云于鱗詩自工但恨猶是中唐調 何元谷云濟南
以高華嘹唳取勝非不全莖玉樹月鶴霜鍾第語過清空意少變化
段虎臣云嘉隆間王李等七子詩學盛唐不過庄廓耳至於深沉之思
雋永之味超脫之趣尚未入室 曹能始云于鱗古詩不作漢魏以後
語然有心學步去之愈遠而無意者時或近之至其樂府自謂擬議以
成變化而予無取焉 焦弱侯云七子互相矜許雖有名於時而詞調
往往如出一人 錢受之云于鱗擬古句拗字据與會索然神明不屬
自謂胡寬之營新豐而不知為壽陵餘子之學步於邯鄲也七言今體
三百年來推為冠冕然舉其字則三十餘字盡之矣舉其句則數十句
盡之矣百年萬里已憎夢出周禮漢官何煩雜誦專城出守動曰東方

千騎方舟竝載撤云二子乘舟遼海中承襲驃騎之號廬江別駕蒙小
吏之呼投打曾母詆許自天傳粉何郎冠以帝謂經義寡稽援據失當
何來天地吾輩中原矢口嚙騰殊乏風人之致易詞夸詡初無贈處之
言於是狂易成風叫吹日甚微吾長夜于鱗既跋扈於前才勝相如伯
玉亦簸揚於後斯又風雅之下流聲偶之極敵也斯文未喪來者難誣
當葵丘震驚之日仲蔚已有違言迨稷下消歇之時元美亦持異議而
王元馭序弁山續集詆訶歷下謂不及三十年水落石出索然不見其
所有斯藝苑之公論也 文湛持云濟南七律接軫李頎可無漸色
陳卧子云于鱗天骨既高人工復盡如玉出藍田而復遇巧匠珠同隋
侯而更耀螭首故遇瑕則別有美必雙總其經營反側不輕染翰故能
領袖羣倫五古規摹建安潘陸以後涉筆便少未免取境大狹七古原
於李頎而雄整過之五律雜出盛唐諸家七律有玉維之秀雅李頎之
流麗而又加整練高華固為千古絕調絕句調甚練而若出自然意必
渾而每多可思照應頓挫俱有法度未易至也 姚仙期云于鱗擬古
自黃澤白雲南山越人而下幾欲一字一意不差毫髮比於胡寬之營
新豐獨不思伯樂相天下馬若誠若沒若忘若失自有其天機耶 王
貽上云滄溟拿州皆萬人敵惟蹊徑
稍多古調寢失是以不逮弘正作者
靜志居詩話于鱗樂府止規字句而遺其神明是何異安漢公之金滕
大誥文中子之續經乎惟相和短章稍有足錄者五言學步蘇李曹劉
如浮雲從何來焉知非故鄉來者自為今去者自為昔差具神理然新
警者寡矣七古五律絕句要非作家惟七律人所共推心摹手追者王

明言紀卷四十六
維李頎也合而觀之句重字複氣斷續而神孤離亦非絕品元美比之
峨着天半雪至謂文許元秦上詩罕正始還譽過其實于麟乃居之不
疑據白雪樓高自位置此時章丘李伯華架插萬卷書海豐楊伯謙吟
精五言體是宜降心相從乃敢大言謂微吾竟長夜豈非妄人又自詡
與元美狎主齊盟日四溟以橐
韃鞭弭左右四溟豈心服乎

紫騮馬歌 二首

出入渭城中少年獨妍雅不知是阿誰但識紫騮馬
問客復何為昨日發東平袖中出短書心知自劉生

懊儂歌

長江得春風使帆如使馬朝發牛渚磯暮宿白門下

黃督

誰能見歌舞不自愛陽春少年雙淚落知是他鄉人

古意

秋風西北起吹我游子裳浮雲從何來安知非故鄉蕭
蕭胡馬鳴翩翩下枯桑暮色入中原飛蓬轉戰場往路
不可懷行役自悲傷

送趙戶部出守淮陽

仙郎起草漢明光幾載軍儲事朔方五馬新為淮海郡
三臺舊署度支章行車麥秀隨春雨卧閣花深對夕陽
時憶上林詞賦客鴻書遙下楚雲長

送皇甫別駕往開州

銜杯昨日夏雲過愁向燕山送玉珂吳下詩名諸弟少
天涯宦迹左遷多人家夜雨黎陽樹客渡秋風瓠子河
自有呂虔刀可贈開州別駕豈蹉跎

同元美與子相公實分賦懷太山得鍾字東順甫
域內名山有岱宗側身東望一相從河流曉挂天門樹
海色秋高日觀峰金篋何人探漢策白雲千載護秦封
向來信宿藤蘿外杖底西風萬壑鍾

陸水修云起二語嫌太淺弱

懷子相

薊門秋杪送仙槎此日開尊感歲華卧病山中生桂樹
懷人江上落梅花春來鴻鴈書千里夜色樓臺雪萬家
南粵東吳還獨往應憐薄宦滯天涯

郡城樓送明卿

徙倚高樓問索居故人湖海意何如尊中十日平原酒
袖裏三年薊北書大麓夏雲當檻出石門寒雨過城疎

明朝遠道空相憶那得仍停使者車

寄劉子成

書札清秋問解攜郡齋吟眺楚雲低大夫持憲臨諸粵
使者徵兵出五溪白日自流荒徼外青山不盡夜郎西
於今萬里看銅柱何意中原厭鼓鼙

平涼

春色蕭條白日斜平涼西北見天涯唯餘青草于孫路
不屬朱門帝子家宛馬如雲開漢苑秦兵二月走胡沙
欲投萬里封侯筆媿我談經鬢有華

重送山甫

短髮蕭蕭日影孤清秋行色又皇都百錢杖底猶懸否

片刺懷中好在無老去他鄉唯藥物愁來佳句滿江湖
只言倒屣尋常事不是燕山舊酒徒

子與病起移書二美吳下羣賢爰修禊事踊躍勝
遊遙為屬寄

伏枕經春憶舊遊永和三日命扁舟一時藝苑人亡恙
千載蘭亭事可求吳下山川何緼藉王家兄弟本風流
獨憐搦管傳觴處有客中原自白頭

上朱大司空

河隄使者大司空兼領中丞節制同轉餉千年軍國壯
朝宗萬里帝圖雄春流無恙桃花水秋色依然瓠子宮
太史但裁溝洫志丈人何減漢臣風

郡齋同元美賦得橋字

山色秋停使者輶孤城何處不蕭條請看襄子宮前水
依舊東流豫讓橋

春日聞明卿之京為寄

十載浮雲傍逐臣歸來不改漢宮春摩挲金馬宮門外
誰識當時諫獵人

贈梁伯龍

太華峰頭玉女壇別時明月滿長安不知秋色今多少
君到仙人掌上看

王世貞

四十二首

世貞字元美太倉州人嘉靖丁未進士除刑部

主事歷郎中出為山東副使以父難解官補大名兵備歷浙江參政山西按察使入為太僕寺卿以右副都御史撫鄖陽遷行大理寺卿歷應天府尹南京刑部侍郎改兵部進刑部尚書有

弇州正續四部豪

穆敬甫云元美才識雄俊氣韻沉鬱足稱大家汪伯玉云于鱗業專專故精而獨

至元美才敏敏則洽而旁通其取材也若良冶之操爐錘五金三齊無不可型其運用也若孫吳之在軍門宮嬪中人無不可陳彭子服云元美四部豪未免篇帙太富使人不能分去取王承父云弇州與歷下同名而異用博大僻遠汪洋磅礴無所不入安究其底則死骨未寒非之者過於慕之者矣胡元瑞云弇州於古人詩靡所不有亦靡所不合詞與代變意逐題新譬之龍宮海藏萬怪惶惑弟敬美云吾兄境雖神詣學以年幼取材愈博演教彌神或鬼篆蛇文冥搜六合之外或牛溲馬勃近取咫尺之間雜觀則魏若無關漆注則天然一色大都字險者韻必妥韻奇者聲必調天壤之間若為預設此真藝林之絕技也樂府一出必使于鱗隱響明卿窺影宏篇奧句故是苦心極力之言齊梁小調亦無敵手邇來述作大成取材欲盡不覺時隨香山玉局趣中吳文仲云李何並駕李雄視何而李不若何之冲而雅也王李

齊驅王盛推李而李不若王之博而大也蔣仲舒云元美曠古逸才當今大雅二鳴四部千載一時蘊藉則崑山良璧懷瑾握瑜聲華則震澤明珠連城照乘何元谷云弇州主大直欲體具百家包括今古汪洋萬里崩奔自恣而意貴富贍詞多填實求其風雅相宣情境互暢較之唐人蓋有間矣錢受之云元美弱冠登朝與濟南李于鱗修復西京大曆以上之詩文以號令一世于鱗既沒元美著作日益繁富而其地望之高游道之廣聲律氣義足以翕張賢豪吹噓才俊於是天下咸望走其門若玉帛職貢之會莫敢後至操文章之柄登壇設壇近古未有迄今五十年弇州四部之集盛行海內毀譽翕集彈射四起輕薄為文者無不以王李為口實而元美晚年之定論則未有能推明之者也元美之才實高於于鱗其神明意氣皆足以絕世少年盛氣為于鱗輩牢籠推挽門戶既立聲價復重壁之登峻陔騎危牆雖欲自下勢不能也迨乎晚年閱世日深讀書漸細虛氣銷歇浮華解駁於是乎泯然汗下遽然夢覺而自悔其不可以復改矣論樂府則亟稱李西涯為天地間一種文字而深譏模放斷爛之失矣論詩則深服陳公甫論文則極推宋金華而贊歸太僕之画像且曰余豈異趨久而自傷矣其論藝苑危言則曰作危言時年未四十與于鱗輩是古非今此長彼短未為定論行世已久不能復祕惟有隨事改正勿誤後人元美之虛心克己不自掩護如是今之君子未嘗盡讀弇州之書徒奉危言為金科玉條之死不變其亦陋而可笑矣陳卧子云元美天恩穎俊取材贍博師心獨運而不累其法擬議眾芳而不掩其才讀之如入五都之市珠璣瑤瑤雖西域賈胡不能盡收然龜蔬陳列亦足使販夫馱馱又云元美樂

府不必盡合古人甚見才思 宋子建云元美如西域化人手易山川
海量珠玉 宋轅文云元美七言勝於五言近體勝於古體合而觀之
未能與濟南伯仲請以迪
功之精銳三千當其數萬

詩話嘉靖七子中元美才氣十倍于鱗惟病在愛博筆削千兔詩裁兩
午自以為靡所不有方成大家一時詩流皆望其品題推崇過實諛言
日至箴規不聞究之千篇一律安在其靡所不有也樂府變奇奇正正
易陳為新遠非于鱗生吞活剝者比七律高華七絕典麗亦未遠出于
鱗下當日名雖七子實則一雄其自述云野夫興就不復刪大海迴風
吹菰瀾言雖大而非夸若于鱗自詡至云微吾竟長夜惑易之言亟當
浴以蘭
湯者也

尚書樂

揚翠眊曳金支馬駮駮車逶迤手將兩黃鉞大者誅二
千石小者修偏裨九卿班餞日崦嵫相君昵昵前致辭
尚書行出師樂哉尚書奈樂何解一所過二千石喪魂魄
日夜輦重稱軍食黃金如山莫譙訶累女對對顰青蛾

回鶻小隊桃葉歌中丞奉觴舞迴波樂哉尚書奈樂何

解二犬宛驄珊瑚鞭天吳繡感當曾盤麒麟玉刻稱腰圓

珍怪百寶裝千船席卷三吳向青天九卿班迎晡不得

前相君昵昵前致辭中官黃紙紛而馳尚書告班師樂

哉尚書奈樂何解三朝賜尚書夕賜尚書尚書第中錦不

如檀牀八角垂流蘇紫衣屏息駢街衢欲進不進足次

且左右十二波斯胡平頭奴子貂襜褕醉著不下公侯

車樂哉尚書奈樂何解四雲霾辭天雨洗白日詔收尚書

下請室削之歸一官不得著昔來一何駭今歸一何疾

念欲乘柴車病不得驅欲呼估客舟估客不肯相於婦

女諱罵小兒拍手擲揄道逢九卿睥睨之謁辭相君相

君新門十二重東流之水西飛鴻昔日父子今華戎樂
哉尚書奈樂何五解

江陵伎

江陵伎人子掩袂作啼聲家家又簾立送王上臺城一解
王欲別太姬門前黃紙催出亦以徘徊入亦以徘徊二解
王入臺城後不省作悲啼妝臺鉛粉驕別接冶遊兒三解
朱門一家哭萬家得安宿一家亦不哭太姬方噉粥四解
門外雙鳥棲啞啞枝上啼官今當大赦不願赦王歸五解
二十四皇孫譬如南隴樹一半枝撐天半不知爨處六解

白蓮花

白蓮花捧世尊左跪聖母右拜神君蓮花水浴金盆男
女行照之女為后妃男侯王金貂羅紈耀兩行生當踏
玉階死當坐天堂誰為遣汝來丘太師周太師卻立那
顏東西授汝尺一錦牘赤白號帶兩頭垂但入上谷雲
中得好兒郎因依精兵十萬騎一一銜枚後頭隨天運
固難謀白發所謀私反接向市中號呼衆男女曷不救
我為救我死者坐天堂生當踏玉階忽有一書生衆不
識為誰書生從何來乃是闕下上書男子長流關外醉
卧闌闌間夜半縛致之桃李種山岡蓮花種湖陂刺舟
摘蓮花卻折桃李枝東市標書生頭鼓曠曠使者輶千
金賞萬戶侯道旁跌足涕被面中丞封御史轉承相閣
中三日宴

太保歌

北山虎而翼南溟鯨而爪生世不諧錦衣帥作太保太
保入朝門緹騎若雲屯進見中貴人人人若弟昆太保
從東來一步一風雷行者闌入室居者領其頰太保賜
顏色黃金立四壁一言忤太保中堂生荆棘緹騎走八
方方方俱太保太保百億身所至倏如埽雞鳴甲舍開
爭先衆公卿御史給事中不惜稱門生權飲丞相邸刻
臂爲父子生非真骨肉子貴父不喜但呼太保名能止
小兒啼鬼伯一何驚荷索便相催縣官爲震動急救治
喪事少府出金錢東園給祕器後帥朱都督特遣護其
家起家像陰山巖肩插雲霞弔客雖以繁不及賀者多
可憐堂中哭不勝巷中歌

袁江流鈴山岡當廬江小吏行

湯湯袁江流截嶽鈴山岡鈴山自言高袁江自言長不
知何星宿獨火或貪狼降生小家子爲災復爲祥瘦若
鸛雀立步則鶴昂藏朱蛇戢其冠光彩爛縱橫孔雀雖
有毒不能掩文章十五齒邑校二十薦鄉書三十拜太
史屹屹事編摩五十天官卿藻鏡在留都六十登亞輔
少保秩三孤七十進師臣獨秉密勿謨八十加殊禮內
殿敕肩輿任子左司空孽孫執金吾諸兒勝拜跪一一
賜銀緋甲第連青雲冠蓋羅道途瀑直不復下中禁起
周廬涼堂及便房事事皆相宜文絲織隱囊細錦爲牀

帷尚方鑄精鏐胡盃杯苾籬雕盤盛玉膳黃票封大禧
五尺鳳頭尖時時遣問遺黃絨團蟒紗織作自留司匹
匹壓紗銀百兩頗有餘煎作百和香染為混元衣溫涼
四時藥手自劑刀圭日月報薄蝕朝賀當暑祁佗卧不
必出稱敕撰直詞御史噤莫聲緹騎勿何誰相公有密
啓為復未開封九重不斯須婕妤貼當胸密詔下相公
但稱嚴少師或字呼惟中縣官與相公兩心共一心相
公別有心縣官不可尋相公與司空兩心同一心司空
別有心相公不得尋昔逐諸城翟黃冠歸田里後詒貴
溪夏朝衣向東市戈矛生聲咳糞粉成睚眦朝疏論相
公篁榻夕以至寧忤縣官生不忤相公死相公猶自可

司空立殺爾凌晨直門開九卿前白事不復問詔書但
取相公旨相公前報言但當語兒子兒子大智慧能識
天下體九卿不能答次且出門去不敢歸其曹共過城
西邸司空令傳語偶醉未可起去者歸其曹留者當至
未九卿面如土九卿足如枳為復且忍饑以次前白事
司空有得色相公直廬喜司空稍囁嚅相公直廬恚不
復問相公但取司空旨縣官有密詔急取相公對相公
不能對急復呼兒子兒子大智慧能識天下體一疏天
怒迴再疏天顏喜九邊十二鎮諸王三十國中外美達
官大小員數百各各黃金鑄一一千金直南海明月珠
于闐夜光玉猫精鴉鶻石酒黃祖珥珠紅紫靑靛鞞大

者如拳蕨薔薇古刺水伽南及阿速瑞腦真龍涎十里
為芬馥古法書名畫何止千百軸玉躡標金題煌煌照
箱籠妖姬回鶻隊隊皆殊色銀牀金絲帳玉枕象牙
席香衫平頭奴絲滕雙蹴鞠酒闌呼不見潛入他房宿
生理馮子都爛煮秦宮內生者百叢花歿者一叢棘近
即龍牀底遠至陰山後凡我民膏脂無非相公有義兒
數百人監司迨卿寺以至大節鎮侯家并戚里逶迤洙
泗步燦燦西京手老者相公兒少者司空子謂當操鈞
柄天地俱長久御史上彈章天眼忽一開詔捕少司空
究覈諸賊罪三木囊赭衣炎方禦魑魅金吾一孫戍餘
者許歸侍意猶念相公續廩存晚計舳舻三十艘滿載

金珠行相公船頭坐誰敢問譏征嘯傲都塢間足誇富
家翁司空不之戍還復稱司空廣徵諸山材起第象紫
宮募卒為家衛日夜聲洶洶從奴踏邑門子弟郡國雄
不論有反狀訛言所流騰宗社萬不憂黔首或震驚御
史再發之天威不為恒御史乘飛置捕司空至京司空
辭相公再拜泣且絮今當長相別兒不負阿父相公心
自言阿父寧負汝不識一丁字束髮辟三府月請尚書
奉冠服亞汝父汝父身不保安能相救取重懇監刑容
少入別諸姬歸者吾而配不歸而鬼妻諸姬心自言司
空何太癡歸者吾而配不歸人人妻還撫諸兒郎阿爺
生別離金銀空饒積高與鈴山齊不得鑄爺身及身身

始知兒郎心自言阿爺何太癡有金兒當使無金兒自
支監刑兩指揮各攜鐵銀鐙程程視洩寢步步相扶將
有酒強爲歌無酒夜傷徨秋官爰書上頃刻飛騎傳一
依叛臣法斫死大道邊有尸不得收縱施羣鳥爲家貲
巨千萬少府司農錢上寶入尚方中寶發助邊不得稱
相公沒入優老田片瓦不蓋頭一絲不著肩諸孫呼踐
更夕受亭長鞭僮奴半充戍餘者他州縣夜半一啓門
諸姬鳥獸窟里中輕薄子媒灼在兩腕相公逼饑寒時
一仰天歎我死不負國奈何坐兒叛傷人爲大笑惜汝
一何愚汝云不負國國負汝老奴誰令汝生兒誰令汝
縱史誰納庶僚賄誰腹諸邊儲誰僂直諫臣誰爲開佞

諛誰仆國梁柱誰剪國爪牙土木求神仙誰獨稱先驅
六十登亞輔少保秩三孤七十進師臣獨秉廊廟謨八
十加殊禮內殿敕肩輿任子左司空孽孫執金吾諸兒
勝拜跪一一賜銀緋甲第連青雲冠蓋羅道途以此稱
無負不如一婁豬食君園中料爲君充庖廚以此稱無
負不如一殺齏食君田中草爲君禦霜雪以此稱無負
不如韝中鷂雖飽則掣去毛羽前嚙決以此稱無負不
如鼠在廁雖有小損傷所共多污穢相公寂無言次且
復傷徨頰老不能赤淚老不盈睡生當長掩面何以見
穹蒼死當長掩面何以見高皇殮用六尺席殯用七尺
棺黃腸安在哉珠襦久還官狐兔未稱尊一丘不得安

為子能負父為臣能負君遺臭污金石所得皆浮雲

詩話長篇不費剪裁滔滔莽莽洵有大海迴瀾之勢
題雖當廬江小吏作要其節奏兼本於佛經偈言

置酒行

置酒高堂上樂聲慘不發手抱三鷗絃檀槽如秋月此
樂名為誰言是羌中出本以寫哀思云何虞賓客聽曲
各稱好竟令沉懷鬱歛響赴流光悠悠逝倉卒未坐而
楚衣一聽三歎息

僊人篇

結茅華山顛上有蒼鱗車僊者四五人要我偕所如邀
遊天漢上經歷萬里餘人間所見星乃是千白榆玫瑰
切庭階木難交綺疏不知何宮殿但怪非人居呀然珠

簾起四角垂流蘇中坐太乙君夾侍青童姝飲我丹霞
漿今我易肌膚碧藕錯朱桃玉饌芬且腴天樂不能名
但用窮歡娛回首望故鄉妻孥不得俱坐此一念謫聊
復在泥塗疆疇雖歷歷他姓治田廬欲返渺何用惻愴
但含吁

折楊柳行

曷不為男子不覩苧蘿村種蠶兩謀臣不能勝婦人
齊謳走孔丘秦樂逐由余但施婦人巧賢聖亦不如
絳灌及樊鄴手扶漢天子匈奴北方來不如一公主
東家有匹雛牝者亦司晨西家婦女坐牀上男子拜伏

堂下塵

解四

企喻歌

二首

男兒好橫行橫行身自樂那見摩天鷄結伴尋鳥雀
女子愛妝束妝束頭上釵男兒愛妝束妝束坐下騮

折楊柳歌

桃花二三月故愛東風吹阿母不嫁女忘取少年時

歡聞歌

感歡千金贈亦擬報千金數盡人間物無如儂寸心

謁表忠祠有述

聖皇肇貽厥元孫嗣繩其武略或不競文治所優為諸
王擅國封分布若置碁稱詔行罰賞匠意創車旂是時
上威令頗不出京師黃齊託肺腑力以身任之周叔既

遠竄齊谷復長羈北平有髭王屬尊功不卑望氣若龍
虎養卒皆熊貔削地錯已愚奪國寧所宜謀泄漢使僂
漁陽動征輦橫驅屬國胡席卷燕南垂廟謨大草草名
使乳臭兒蹀血白溝河肉骨蔽陵坻盛侯頗能軍平保
壯偏裨一此或一彼天心詎能知桓桓鐵尚書矯矯六
出奇東昌不茅摩濟南湯其池有斐天台生密勿主所
葵肆赦赦不行用間間不疑大廈既將顛一木焉能支
飛檝渡大江羣情遂乖離三輔擬勤王姚守已俘累朱
邸獻重關將相請密期舉宮為煨燼誰辨真龍尸魏公
元勳後不以密戚移甘作請室囚竟終首陽饑始禍復
何言縱體任剗剗天台乃甚口五宗悉參夷鐵公氣猶

勁慷慨了不悲自餘諸名俊卿尹暨曹司俱懷吠犬忠
不識堯為誰而彼景中丞趣朝獨逶迤荆御術未講豫
讓心空馳嘔血噴北風捐脛付東瘞如聞九原轍故主
未可追長寢事已畢何煩論安危笑彼崩角者次第死
胥靡拂鬱二百年身碎節不虧君王沛明詔彷彿異代
思加恩錄後人所在為致祠建康殉節地羣靈當格斯
故主猶若教焉能不攢眉侑食懿園席行當待來茲

早起

初月將曙輝亭亭澹空碧微星漸以隱存者猶歷歷玄
蟬乍停號宿羽時鼓翼時至鐘未鳴山僧嬾成寂

暑嬾

一暑生百慵一慵百事簡偃息衡門下悠悠夢初轉亭
午鳥倦啼槐陰自舒卷時有涼風來冷然忽稱善勿謂
羲皇人此意知者鮮

發自義興由東九抵湖汊一首

揚舲出荆溪溪流浩無盡疇謂當蕭辰青山吐餘潤驚
鱗發潛響振羽橫遙瞬時見空翠來焉知余榜進喬木
生午烟場禾表秋信茶叟攜筐歸行歌渺然近顧余若
有適壺漿當為引明發從此辭中宵衣時振

入林屋洞天不能竟有述

林屋第九天中藏萬金庭北穿丈人峰西達峨眉陁垂
滋結乳玉穿溜散空青吟岬藏石門增吟吐神鉦是時

秋始暮積潦尚澄盈雖負褰裳勇蹀擊中不勝通慚孺
子託遠媿靈威生誓欲偕青童飈輪探窈冥千載靈文
出聖治冀可徵

贈梁公實謝病歸

汝謀結室羅浮頂下飲仙人葛洪井桂樹宛宛山日深
松花濛濛白雲冷我亦僅買蜻蜒舟歸與少年爲薄游
采蓮一曲杳然去得醉即卧清溪頭

醉後勸客飲

今日爲客挂却頭上廡解我腰間魚簪纓縲繼不足道
形骸土木終何如少年彈碁六博兼樗蒲一一將置前
庭除與客遞起爲歡娛客不見洛陽蘇生惡少年開口

造化俱無權橫六黃金五車裂總爲城南二頃田客不
見魏齊聲勢同山丘厠中死人斷君頭黥徒馬食相當
下當時溺者秦應侯人生反覆難預期精靈一別千憂
隨請看草木有榮悴榮者何恩怨者誰丈夫不能齷齪
權門取榮貴驅遣七尺供妻子又不能仰面看屋梁萬
歲千秋亦如此濁涇清渭何能理先生一言客記取拍
浮酒船吾足矣

慰明卿再謫長短歌和李于鱗

明堂堂成不見帝十二牧伯朝遂巡丞相肩輿入內殿
搖筆一掃三千人王生束裝視黜籍乃見武昌吳國倫
無官可謫左已久有地足徙恩仍新甘泉諸貴氣成雲

吳也亦是甘泉臣小臣無狀業萬死尚許短檝隨風塵
長沙坐中止鵬鳥魯東門外悲麒麟何方魑魅不撫掌
何處猿猴不鼓脣李侯杜門十月矣惜女再黜奚其陳
此時尺一馳南康府主擲揄目吳郎卷衣大笑出府舍
一舸乘風上武昌匡廬五老宛相揖長江九派流飛觴
歸來蕭條四壁立大婦諍罵小婦傷女等徒稱擅金石
豈無宗徐李與王時從處士誇鸚鵡可掾文君典鸛鷄
何物故人能見負却令妻子徇文章啼寒泣饑苦未已
東馳西竄窮遐荒燕中炊米若炊玉公田種秫不種秔
貢家車馬誰與買季子貂裘胡計藏解道人間富官職
女豈不念頭上霜吳郎欲荅荅不得王生請爲歌夙昔
日者歲之丙辰前五星猶聞在奎壁片語高呼白雪飛
寸心肯讓青雲色吾宗少年強解事吳郎目懾遺其烏
豈唯吳郎衆辟易但語吾曹少堅敵司空過鼓盡裸袒
武安行酒半膝席小兒僅呼楊德祖一錢可擬程不識
儻問曹中理公事君其且看西山碧故知萬變同翻手
風雨青天晝能吼遺鳥少年坐上坐誰哉捧案前奔走
世人榮辱強相制吾輩行藏終自取妻子寧須饒遠略
且用七尺餌其口即使女官更削盡豫章男子得活不
女乏江陵千樹橘來共吳門千畦韭耕盡要離墓上雲
洗眼看他竟何有

夢中得語云百年那得更百年今日還須愛今日

因戲成短歌

化人宮中百事無道書一卷酒一壺枝頭黃鳥聽作曲
西山白雲看作圖朝愛朝暎上東岫夕愛夕陽映東牖
任他故人不通謁任他朝事不挂口偶然案頭餘酒杯
偶然躡屩山僧來自斟自醉當自去禮豈設為我輩哉
昨夜惜騰意超忽寤時得語醒時述百年那得更百年
今日還須愛今日縱能拂衣歸故山農耕社劇亦不閒
何如且會此中趣別有生涯天地間

藏經閣西偏俯小菴画溪

紺宇藏經閣春雲罨画溪隔花催小艇落日在招提彼
岸如相引真源自不迷老夫繙閱罷隨意步東西

大行方皇后輓歌

密雨椒塗淨傷雲鷲輅興深宮六衣卷導扇五華層僊
馭何其杳神君不可憑還應從此日起觀望昭陵

憶昔 二首

憶昔文王三出邊六龍飛雨淨烽烟天門直向陰山闢
北斗翻從南極懸鐵馬春饑填瀚海金人秋祭失祁連
只今何處無廉李野哭荒村幾幾年
更憶南巡漢武皇樓船車馬鬱相望輕裘鄴社張公子
挾瑟邯鄲呂氏倡秋淨旌旗營細柳夜深烽火獵長楊
孤城尚有遺弓淚不見當時折檻郎

送瞿師道太史使大梁周府

明詩卷四十一
長安草色上鳴珂繁吹春調四牡歌太史授圭開赤社
宗藩如帶指黃河天邊漢節蛟龍擾雪後梁園鴻雁多
上客知君頻授簡鄒枚詞賦未應過

戚大將軍入帥禁旅在駕草堂賦此贈別

初聞小隊駐吳江忽漫花溪隱画艫細柳尚虛金鎖甲
前茅時緩碧油幢南中舊部思馳義塞上新城喜受降
儻寫雲臺須第一如論國士總無雙

履善比部歸自嶺右賦此問之

聞君八月下牂牁銅柱天荒使者過桂嶺風來秋色早
盤江木合瘴烟多蠻童夾道誇椰酒蠻女穿花出櫂歌
向識子雲奇字擅近來詞賦更如何

清明遇雨

昨歲清明指冀方今朝寒食滯鄖陽兒曹上冢亦隨例
客子思親偏斷腸四十九年年已去一百五日日初長
毋論積雨斷新火縱得餘光非故鄉

衛河

河流曲曲轉十里還相喚那比下江船揚帆忽不見

江口

江口安檣處孤舟盡日停秋雲無限好只傍蔣山青

教坊婦

小拂乾紅袖新聲十四絃不知頭已白猶唱想夫憐
道過一嶺曰米花邨其名頗雅因成一絕

夾溪黃葉路三戶米花邨車馬須臾事寒山日掩門

正德宮詞 二首

窄衫盤鳳稱身裁玉靶雕弓月樣開紅粉別依回鶻隊
君王新自虎城來

夜半毬燈出未央俄傳鞞鐸向平陽六宮處處秋如水
不獨長門玉漏長

西城宮詞 二首

兩角鴟青雙箸紅靈犀一點未曾通自緣身作延年藥
憔悴春風雨露中

梨園弟子鬢如霜十部龜茲九部荒妒殺女冠諸侍長
大羅天上奏霓裳

題文待詔畫

孤峰遠插白雲間秀竹長松相對閒聽得菱歌人欲近
不知猶隔法華山

避暑山園

殘杯移傍水邊亭暑氣衝人忽自醒最喜樹頭風定後
半池零雨半池星

登蛾眉亭有懷

回首江南黯澹雲蛾眉亭畔思紛紛何因却作姑溪水
流到長江尚不分

姑溪水流出長江自為一帶

洞庭兩山竹枝歌 二首

橘綠橙黃香滿枝甕頭騶玉鱸魚絲山中曆日由來少

知是江南九月時

白雪纒成繭子繇黃雲剪就稻花天千家邨裏無開市

三尺溪頭有繫船

謝 榛 十四首

榛字茂秦臨清人有四溟山人集

朱中立云四溟詩法感唐而氣格不

逮 王元美云謝茂秦如大官舊庖為小邑設宴雖事饌非奇而經飪不苟又云排比聲偶為一時之最第與寄小薄變化差少 彭子殷云茂秦諸體壯麗類大曆以上 穆敬甫云茂秦志在學杜庶幾升堂游燕入晉二豪傳誦藝林至江南入洛等集若出二人手髮矣 陳玉叔云山人窮極而思工思工而語至 胡元瑞云茂秦融和流暢自是中唐與諸公大不同 蔣仲舒云茂秦詩宗少陵窮體極變近時之麟鳳哉 江進之云求真詩於七子之中則謝茂秦者所謂人棄我取者也 錢受之云山人嘉靖間挾詩卷游長安脫黎陽盧柟于獄諸公皆多其行誼爭與交驩是時于鱗元美結社燕市茂秦以布衣執牛耳已而于鱗名盛茂秦與論詩頗相雋責于鱗遺書絕交元美諸人咸右于鱗交口排茂秦削其名於七子五子之列然茂秦游道日廣秦晉諸藩爭之致之河南北交稱謝榛先生諸人雖惡之不能窮其所往也當七子

結社之始尚論有唐諸家茫無適從茂秦主選十四家詩熟讀之以會神氣申詠之以求聲調玩味之以復精華得此三要造乎渾淪不必翹生謫仙而書少陵諸人心師其言厥後雖爭攘茂秦其稱詩之指要實自茂秦發之茂秦今體工力深厚句響而字穩七子五子之流皆不及也 陳嗣子云茂秦沉練渾渾法度森然真節制之師位在于鱗之下徐吳之上 宋棘文云茂秦五律似勝諸名家然句法篇法未免束縛神情不能出四十字外此其所以不如也七律源出嘉州情景清切 陳伯璣云山人說詩取初盛之二家并李杜集中之最佳者錄成一帙王李諸公俱用其法近人多以王李為口實并謝集亦束之高閣不復寓目間有誦法之者止知其聲格之高而不知其意境之細子謂山人詩凡可想像摹擬者便佳以其用意委曲也 五言古只平平寫懷不復好奇角勝律詩多有傷於迫促者

詩話七子結社之初李王得名未盛稱詩選格多取定於四溟于鱗贈詩云謝榛吾黨彥咄嗟名士籍遂令清廟音乃在褐衣客於時子與公寔子相元美撰五子詩成首四溟而次以歷下既而布衣高論不為同社所安歷下乃遺書絕交而曰豈其使一眇君子肆于二三兄弟之上必不然矣迹其際末乃因明卿入社四溟喻以糞土由是布惡於眾元美別定五子遽削其名曰後五子則南昌呂余曰德德甫蒲圻魏裳頓甫徽注道昆伯玉銅梁張佳胤肯甫新蔡張九一助甫也曰廣五子則崑山俞允文仲蔚濬盧柟次樞濮陽李先芳伯承孝豐吳維嶽峻伯南海歐大任楨伯也曰續五子則陽曲王道行明甫東明石星拱辰從化黎民表維敬豫章朱多燧用晦常熟趙用賢汝師也曰末五子則用賢及

京山李維楨本寧鄞屠隆緯真南樂魏允中懋權蘭溪胡應麟元瑞也
其後廣為四子而四溟終不得與焉故四溟賦雜感詩有奈何君子
交中道兩棄置之句亦可憫矣歷下有言眇君子雖老而編墨猶存則
亦未嘗深絕之特明時重資格於章服中雜以韋布終以為嫌爾四溟
論詩云平順却難嶮熾易斤斤局守格律尺寸不踰有雋句而乏遠神
有雄句而無生氣或謂勝介州之汗漫然介州才大如曹孟德放蕩無
威儀笑時頭沒杯案不失為英雄四溟罄折雖
工特公孫子陽之修飾邊幅僅堪作清水令耳

送謝給事封蜀

使星巴蜀外漢節夜郎西樹斷分金馬江清見石犀王
孫重茅土天子錫桐圭異世懷張載應留劔閣題

有感

薄伐元中策論兵自古難漢唐頻拓地將帥幾登壇絕
漠兼天盡交河蕩日寒不知大宛馬曾復到長安

秋野

地闊清霜滿林寒市葉稀野雲秋澹澹山日晚暉暉殺
氣三河動邊聲一騎飛中原多猛士誰解晉陽圍

暮秋即事

十見黃花發孤樽思不勝關河秋後雁風雨夜深燈留
滯悲王粲交游憶李膺相隨少年子走馬獵韓陵

初冬夜同李伯承過碧雲寺

竝馬尋名寺登高藉短筇飛泉鳴古澗落月在寒松石
路經千轉雲巖復幾重人間多夢寐誰聽上方鐘

晚眺

寒日下西陵漳河晚渡冰孤城歸獵騎雙樹隱禪燈野
眺心何遠巖棲老未能翻憐戎馬日愁思坐相仍

登榆林城

憑高望不極天外一鴻過衆嶺夕陽盡孤城寒色多蘆
笳滿亭埃羽檄度關河遙憶龍庭士嚴霜正荷戈

暮秋簡徐別駕載卿

南征秋轉劇不寐夜漫漫白髮艱虞盡滄洲去住難旌
旗連野暗兵甲照江寒選將須臾事誰能議築壇

南巡歌

南楚旌旗合黃塵走百官天王重巡幸民物識艱難馳
道春風動行宮夜月寒萬年垂拱意歌頌入長安

宿淇門驛懷孫方伯性甫王憲副廷瞻江少參伯
陽

駐馬淇門夕堂空暑氣徂亂雲關樹暝寒雨驛燈孤身
計聊時序鄉心復道塗何當報知己秋雁滿江湖

送謝武選少安犒師固原因還蜀會兄葬

天書早下促星軺二月關河凍欲消白首應憐班定遠
黃金先賜霍嫖姚秦雲曉度三川水蜀道春通萬里橋
一對郾筒腸欲斷鶴鶴原上草蕭蕭

楊參軍次和歸自古北口

淮南高士落人間仗劔經秋未破顏自惜草玄淹歲月
可堪垂白向邊關天橫落照明孤壘地擁寒沙接亂山
長路誰能問行役夜來驅馬雪中還

秋日懷弟

生涯憐汝自樵蘇時序驚心尚道塗別後幾年兒女大
望中千里弟兄孤秋天落木愁多少夜雨殘燈夢有無
遙想故園揮涕淚况聞寒雁下江湖

擣衣曲

秦關昨寄一書歸百戰郎從劉武威見說平安收涕淚
梧桐樹下擣征衣

梁有譽九首

有譽字公實廣州順德人嘉靖庚戌進士任刑

部主事有蘭汀存豪

王元美云梁公實如綠野山池繁雅句適又如漢司隸衣冠令人驚美但非全盛儀物胡元瑞云公實與諸子最早成律詩溫厚縝密但氣格微弱曹能始云公實茂秦已入唐人之室錢受之云公實詩詞意婉約殊有風人之致蓋與王李結社後即移病去又捐館舍最早雖參王李七子之列而其叫齟刺擬之習熏染猶未深也陳卧子云公實雋才

意趣沉實若假以年所詣當不止此李鈺章

云公實如清泉出山涓涓駛溜恨未到江河耳

詩話蘭汀學詩於秦泉又與鄉人結社號南園後五子所得於師友者

深雖入王李之林習染未甚誦其古詩猶循選體五七律亦無叫齟之

狀四溟而下庶幾此人

度越徐吳奚啻十倍

雜詩二首

圓象無停晷四序迭相循曄曄春華敷忽委埃塵候
蟲善審時鳴鳥常司晨如何建名士遲暮多苦辛衝波
鮮安舟岐路恒摧輪順風響易遠却行難及人鐘鼎鐫
峻功竹帛垂逸民靜躁雖殊域德業終同倫慷慨感中
情高駕良可遵

我行彼中野靡靡令心憂四顧莽無人但見林與丘高
臺多悲風滄海轉洪流走獸駭叢莽號鳥求匹儔顧茲

震心魄欲去將何求古來賢達人高視隘九州嗟哉愚
蒙者矐戀區中謀雍門泣孟嘗牛山悲爽鳩闇彼代謝
理莅物恒怨尤黃屋摩霄舉騰蛇乘霧遊斥鷃爾何陋
枋榆徒啾啾知自有大小達觀德彌優

秋懷

夕霽涼氣發曲房藹餘清金風被蘭茝白露浩已盈密
林謝陽彩叢薄隕芳榮迅商無緩調征鴻懷苦聲物候
既易感神理固難名漢陰甘灌園鹿門事躬耕金張逐
丹轂王貢影華纓由來事不同各以性自營伊予秉微
尚恬曠諧夙情柱下明守雖漆園持達生緬懷昔人訓
煩囂祇自驚

送傅山人游羅浮

仙山直巖遐隙蘊奇信靈造晻靄躡重溟巍峩冠穹昊陰
室引陽輝霧谷通霞島玄溜澤難枯炎林蕊還早故鼎
無留丹煮石有遺老神境誰能躋玄蹤爾方討祕檢洞
中尋塵棕雲外埽陟霄攀若華憑厓掇朱草吹萬固不
同得一以爲好嗤彼蜉蝣士夸毗喪其寶何當榮茅龍
吸景滌幽抱

謁張丞相祠

開元治平日英賢恣游衍夫君匡屯器憂國持先見詎
慙伊呂科實冠東南彥朝直承明廬夕下金華殿楚臣
傷江楓漢女悲團扇而君復何爲含情賦海燕玉泉一

以閉微微市朝變櫬槍亘中天長蛇劔畿甸金根入蜀
年空餘淚如霰我本慷慨士懷古歲方晏野烟冪歷起
祠樹何蔥蒨塞杜寄芳情掇蘋羞野薦高芬誰復嗣舊
葉遙奔箭唯留千載名來哲同興羨

黃司馬青泛軒

達人慕恬寂開軒負西郭芊絲引蕙田逶迤通菌閣積
芳集隆墀耽勝控遙壑蕊氣通幽洞湖光耿華薄青桐
帶露疎翠羽衝花落蜃月鏡疎櫺鵬雲冠虛幕真筌一
以契琴書聊爾託鶴性在烟霞鳳想存寥廓即此頤深
棲陋彼郊居作

瓜步眺望

殘虹慘澹已黃昏江上烟波獨愴魂京口樹濃藏雨氣
海門風急長潮痕西來暮色連三楚北望浮雲隔九閣
正值旗亭須買醉憂時懷土不堪論

夜宿清遠江口

短櫂依依繫晚風壯懷離思浩無窮荒邨夜急菰蒲雨
遠戍秋悲鼓角風白鴈影斜江樹暗青猿聲斷嶺雲空
更堪處處征輪急深箐休論戰伐功

秋夜雨中過黎氏山房

瑤琴不復理空餘山水情棄置石牀上風來時一鳴

宗臣 十七首

臣字子相揚州興化人嘉靖癸丑進士除刑部

主事改吏部歷員外郎中出為福建參議遷提

學副使有方城集

王元美云宗子相如渥洼神駒日可千里未免齧決之累又如華山道士語語烟霞

非人間事 穆敬甫云子相才情兼美造詣未竟使天假之年當能逐鹿于麟角元美 江進之云子相詩句邁逸御風而行 冒伯慶云子相詩自成一境界譬之洞天福地而外別有桃源武陵 錢受之云子相詩元美稱其天才奇秀雄放橫厲又摘其佳句書之屏間以為上掩王孟下亦錢劉而其所就止此子與德甫之倫又可知已 陳卧子云子相意取秀逸不尚深思從此入者易流淺俗 李舒章云子相天姿明佚好自跌宕玉山頹唐時有佳致然其得意處僅得太白之弱者 宋轅文云子相調頗清緊氣力少薄 詩話子相詩才娟秀本以太白為師跌宕自喜使其不遇王李充之不能與昌穀蘇門伯仲自入七子之社習氣日深取材日窘撰體日弱薛荔芙蓉薜蘿楊柳百篇一律訖未成家而天最可惋惜如對曹 蝮李志有狐狸貓貉噉盡之憂然猶愈徐吳之木桶上偶也

楊氏園亭餞別謝榛

離思忽超越逍遙事行游散步過華池芙蓉夾芳流悲
哉蟪蛄鳴淒切動我愁凝霜蒼零落明月澹飛樓感此

歲華暮耿耿生百憂居者不可去行者不可留去留兩
不愜何以慰綢繆

留別子培舍弟

驅車上河梁顧瞻舊鄉國倉卒骨肉親彷徨動顏色子
亦竟以南子亦竟以北本是雙飛鴻胡為乖羽翼送子
從此歸涕下不能食子其從遠猷慰我長相憶

寄人

浮颺動廣野白日慘無色之子在萬里山川渺難極豺
狼滿路衢况復荆與棘我欲往從之惜無晨風翼因風
寄瑤華歲事日云夕去往慙懽悰撫膺長歎息

歸歎

荆門春盡雲陰陰倚杖出門愁暮禽千金裘馬只自好
萬里江湖誰復尋武陵一別桃花深欲歸不歸傷我心
青楓未老楚月白吾將長嘯投吾簪

湖上幽棲為沈二丈賦

主人結屋楚江曲身披薜荔坐空谷青天雙眼望鴻鵠
春風一夜開石門萬里蘼蕪散新綠

登江門諸山

山頭日白雲英英千峰倒插千江明手把芙蓉步石壁
蒼翠亂射後鳥驚誰其雲外吹紫笙欲來不來空復情
天風吹我佩蕭瑟恍疑身在崑崙行

即事

坐歎兵機失兼憂國計存干戈在淮海消息已乾坤授
鉞曾諸將宵衣獨至尊定知哀痛詔早晚下江門

長庚純一舜隆既別憶之

一別不自意茫然空復愁孤舟仍盜賊多病已春秋明
月半江水故人何處樓風塵雙淚眼為我寄滄洲

江上聞明卿量移南康

復得南康信匡廬遂爾狂詩仍官長罵名或簿書強暮
雨湘潭近秋風楚塞長江流如可返為我到潯陽

寄陸子和

江門一別又秋分何處風烟不憶君久客衣裳鶉自結
舊遊尺素鴈為羣十年世路彫青鬢三歎斯人卧白雲

羽翼南溟最相近未須重勒北山文

題画

山徑度青波石門遲白日客到不披衣春風理瑤瑟

聞鴈憶子培

秋雨千峰散寒雲萬里開不知天際鴈幾日故園來

郊行

竝馬出春城搖鞭一相語楊柳遍前山應從何處去

夜立

秋風天外聲明月江中影幽人把桂枝露下衣裳冷

江南曲

客去悲江左書來滯隴西相思若春草無路不萋萋

塞上歌送王侍郎赴薊鎮

榆關北望陣雲高五月天風吹戰袍共說總戎王相國
十年身佩呂虔刀

寄盧少楨

大伾山頭花滿烟春來竟日酒壚眠不知妻子關何事
乞取囊中賣賦錢

徐中行 二首

中行字子與長興人嘉靖庚戌進士除刑部主
事出知汀州府補汝寧用內計謫官稍遷瑞州
判官擢山東僉事歷雲南參政福建按察使江
西左右布政使有青蘿館集

王元美云子與發情止性
喻象比意左準右繩靡所

不合 胡元瑞云子與閣大雄整卓然名家惜少沉深之
 致 陳卧子云子與雖規摹古哲而手追心慕惟在濟南
 詩話子與在西曹與王李結社其贈李詩云寂寞漢魏後乃復挺斯人
 遂令同心者周旋若一身李答詩遠云既聞風雅音三歎文在茲元美
 亦以藹藹吉士目之且云子與性味如醍醐無處不入知其文始終無
 間也俞仲蔚稱子與喜為篤厚之行而不自感滿聞其歷任藩臬俱清
 介有聲卒官至不能具斂而其存日人有所請力不足必勉應之曰奈
 何令人有慙色丁長孺西山日記述閩人董九華業丹青久居長興病
 亡不能歸櫬子與適上官入閩竟
 載其柩以行無所拘忌洵盛德也

春暮將赴汝南廣川舟中寄懷京邑游好

黃河多悲風白日廣川陰驚沙蔽天地方舟猶滯淫躑
 躅將安適曳履援鳴琴一為清商曲灌木俱悲吟知音
 一以隔離思故難任伊予歲寒契莫忘初別心瑤華儻
 可嗣引領伊川潯

感舊

自別燕臺白日徂華陽碣石總荒蕪獨留一片西山月
 猶照當年舊酒壚

吳國倫 四首

國倫字明卿其先嘉興人徙居湖廣興國州嘉
 靖庚戌進士除中書舍人升兵科給事中左遷
 南康府推官調歸德歷知建寧邵武高州三府
 遷貴州提學副使移河南參政有甌甄洞正續

稟

王元美云明卿不揚而企不抑而沉縱不至溢斂不懣鬱塞 王敬

美云明卿詩多實際語不落于鱗網中自可弟畜子與又云他人
 詩多於高處失穩明卿詩多於穩處藏高 胡元瑞云子與近體用字
 多同明卿用句多同故一篇而外不耐多讀 陳卧子云明卿雅練流

逸情景

相副 詩話明卿在七子列最為耆壽元美即世之後與汪伯玉李本寧狎主
 齊盟三君皆不知詩王李既歿海內不敢違言劉子威馮元成屠緯真

明詩綜卷四十六
輩相與附和之顛顛太函大泌等集幾與四部爭富而由拳白榆等集尤而效之海內之為真詩者寡矣其題生壙旁亭柱云陶元亮自祭之文知生知死劉伯倫隨行之語且醉且醒不失為達生之語

前溪歌

迎歡東武亭送歡獨桑路安得大海水盡向前溪注使歡不得渡

濟州南池

瀑水侵階上危亭背郭開分荷移小艇取石坐深苔地迴秋陰合軒空野色來誰能共心賞懷古正徘徊

雨夜挽舟上七里灘

岸東灘聲咽沙兼石齒橫豈緣貪利涉亦復滯王程山雨夜逾急野燈時一明客心雲霧裏懷古不勝情

送姜太史節之使楚王

天子分桐葉詞臣下柏梁共憐星是使况乃玉為堂江漢環宗國風雲護帝鄉居人思過沛太史復浮湘地險東南勝藩盟帶礪長晴山開絳節高浪出牙檣六傳中原路雙鋒北斗傍緘書如有意歸鴈自衡陽

明詩綜卷四十六

明詩綜卷四十七

小長蘆

朱彝尊

錄

梅會

李宗渭

緝評

余曰德

三首

曰德初名應舉字德甫南昌人嘉靖庚戌進士
除刑部主事歷郎中出為福建按察副使有余

德甫集午渠集

靜志居詩話德甫於詩尚未闢見門戶元美冠諸後五子之首未免阿其所好矣然其仿效陶孫作詩評未之及焉豈陽許之而陰抑之與

懷徐子與

苦憶湖州信兵戈尚未休感時愁更切念爾身何由萬
國征輸盡三吳戰血流即今江海上那不問扁舟

送萬彥和僉憲之粵

繫馬花間挂玉鞭
毵毵隄柳亂鳴蟬
河梁自是銷魂地
此日因君倍黯然

過楊給事故居

青瑣歸來迹已陳
百年渾是夢中身
江州滿目山如画
不與人間葬逐臣

魏裳 二首

裳字順甫蒲圻人嘉靖庚戌進士除刑部主事
歷員外郎中出知濟南府遷山西按察副使有

雲山堂橐

王元美云魏順甫知黃梅坐人
談上乘縱木透汗不失門宗

詩話順甫善勝德甫
尚非助甫自甫之倫

雪霽同友人登王子山

畏路誰能到幽懷我獨偏
谷中初見日樹杪忽聞泉
倚杖青山色銜杯白雪篇
交游仍舊俗風景又新年

題白雪樓

郢調淒涼思轉幽卜居還倚鮑山丘
初疑海氣能成市不道仙人獨有樓
乘興好看明月上登高長嘯白雲秋
琴心自在誰堪識且聽巴人下里謳

汪道昆 三首

道昆字伯玉歙縣人嘉靖丁未進士除義烏知

縣歷官兵部左侍郎有太函集

汪禹又云伯玉聲調竝
佳能臻闢奧錢受之

云伯玉於詩本無所解沿襲七子末流妄為大言欺世其白嶽詩落句
聖王若論封禪事老生才力勝相如幾於狂易矣李舒章云汪司馬

詩如新蜀滿地英楚甚寡 徐蘭生云伯玉篇無警策妄自矜大余嘗借大陸語評之混妍媸而成體累良質而為瑕徒悅目而偶俗固聲高而曲

詩話王元美論詩文大指具於危言七卷有云文繁而法且有委吾得其人曰李于鱗簡而法且有致吾得其人曰汪伯玉又云歷下極深新安見裁是心折李汪靡有間矣竊怪其效教陶孫作詩文評苟有寸長必加品薦顧于鱗兩見而伯玉不及焉何與觀四部臺中贈汪序如云上本義如下則姬孔俯踞二京跨千載而上皎然若日中天其言太浮而夸似非出於中心之誠者聞伯玉晚年林居乞詩文者填戶編號松牌以次給發專名之盛幾過於元美蓋元美所推獎二人于鱗道峻仕又不達伯玉道廣位歷崇階人情望炎而趨不慮其相埒也虞山錢氏詆譏伯玉未免太甚所引陸無從記一事竟無從正始堂集中與錢所載略別伯玉裔孫稱無從為伯玉弟子而無從贈弇州歌云濟南新安狹已甚君子視之特小巫不應弟子而毀先師若是也

送張虞部謫嘗州別駕

謫去存吾道流言亦世情聖朝仍得罪佐郡且藏名落日梁谿權平蕪灑水城秋風回首地淚滿逐臣纓

步月

為愛青天月重開白板扉宵游便故里露立任初衣罷
析連城靜當樓列宿稀正思良夜醉未覺少年非

石林

落日石林西林中擁煙霧樵歌何處郎猶記來時路

張佳眉

八首

佳眉字肖甫銅梁人嘉靖庚戌進士除滑縣知縣徵授戶部主事改兵部右侍郎巡撫浙江徵拜兵部尚書加太子太保卒贈少保謚襄敏有

岨嶽山房集

穆敬甫云肖甫詩律精嚴高視千古 李時遠云肖甫詩闊博縱肆凌駕前人 錢受之云司馬才

氣縱橫而乏深雅之致 陳卧子云銅梁註雅亦稱李王後勁

詩話肖甫以功業顯其詩亦多慨惋奮厲之氣與仰屋
梁著書者不同人皆稱其近體不若五古較勝十籌

詠懷

毒暑不辭鍛嚴冬尚為漁裘葛有本性生事因其居伊
予觸世網轉與青雲疎一謫孟諸野再遷首陽且素位
守明誠窮途豈歛獻貴者日以貴寧得辭勞劬賤者日
以賤庶幾遠禍樞

立秋簡徐子與

涼風厲商氣颯然驚早秋白日下圓景大火西南流年
序忽不處陳蔡難久留案牘繁以迫胡為日綢繆洪河
逝如斯草蟲夜啾啾凌厲緬千古遺則懷前修女蘿挂
喬榦玄蚓吸深湫託勢有崇卑適志其良謀

晚入通海

參伐昏正中脂車即廣路松燈馬首明嚴飈起夕霧海
氣蒸春衣捉金逼高戍微茫一寨帷不辨山與樹城邑
行已遙寒濤響孤鶩萬里誠遠游宵征何以故

三甫入渝予不能謁承枉書問且督南征竝訂郢
都之會而寄以詩

良時罕再至嘉會復何如孟冬厲霜氣蓬蒿沒蔽廬興
言念友生抗旌向巴渝便欲往從之山川鬱盤紆感茲
綢繆意遠及銅梁書加餐字未畢殷勤勸脂車漁樵計
已定樊籠日愁予聞君下夔子目極生躊躇孤懷入大
江萬古只東趨郢歌有白雪期我獻歲初醉罷陽春臺

然後策驪駒

上谷使院中課園丁有作

小圃開臺西羣芳會首夏散屨退自公移觴託休暇改
服課園丁流泉任委瀉膏雨抽新條停雲拂高榭間關
衆鳥鳴葳蕤落紅藉悠然抱甕情宛在南山下

寄題永嘉王陽德陽湖精舍

招隱豈在深智者秉微尚伊人卧陽湖幽襟謝塵鞅丹
霞遞崇楸南北兩鴈蕩萬象厲景光凌緬非一狀鷗夷
任所之滄浪發高唱扁舟就何時逝將剡川放

宿黃牛峽

春到黃牛峽江辭白帝城楚雲高不落巴水去無聲絕
塞書難寄孤舟月更明櫂歌聽自短幾處夜猿鳴

登函關城樓

樓上春雲雉堞齊秦川芳草共萋萋黃看雨後流河急
青入窗中華嶽低客久獨憑三尺劔時清何用一丸泥
登高眺極鄉心起關樹重遮萬嶺西

張九一

六首

九一字助甫新蔡人嘉靖癸丑進士授黃梅知
縣考最擢吏部主事歷郎中升行尚寶少卿謫
廣平同知遷湖廣按察僉事進副使擢右僉都
御史撫寧夏有綠波樓集

近體高華雄爽類
于相而精密過之

穆敬甫云助甫詩振宕不羈大
有英雄之槩 胡元瑞云助甫

詩話金谷之筵不遺麥非瑤池之駿圖及盜驪物之所以貴善用生也七子齊盟一時風氣雷同助甫稍能用生政爾拔俗

殘日

怪鳥啼殘日奇峰挂片雲波濤城市合烟火舳舻分卧竝蛟龍穴遊將虎豹羣更傳銅柱北新駐越南軍

初至家陳道義瞿睿甫見過

歸及青春半芳園二仲來月生桐柏水雲斷景夷臺玉笛梅花落金尊竹葉開今宵張仲蔚為爾剪蒿萊

寄見甫弟

歷盡巴山白髮新西風何處不傷神馬曹蹭蹬官難起鳥道艱危老更貧九派長江春後鴈一年芳草夢中人相思况是無消息徒倚天涯涕淚頻

陽和制府解中緋桃甚盛乃毅皇帝手植方少保為賦詩遂次其韻

制府東開一畝宮曾傳翠輦御微風緋桃手自先皇植花譜名將上苑同朔郡何時無雨露彤雲長得護簾櫳孤臣此日瞻春色想像天顏一笑中

登會寧原上作

黯淡山城古會州胡天雙目盡高丘春深柳色猶霜雪日落邊聲起戍樓寒鴈啼雲皆北向濁河歸漢亦東流乘槎豈是窮源使投筆虛疑定遠侯

黃陵廟

黃牛朝暮望青春此日維舟白馬津古廟空山存漢碣

屠羊伐鼓過江人九河注海猶稱異三峽開天始見神
應共長年歌賽酒衣裳鱗介仰陶鈞

俞允文 四首

允文字仲蔚崑山人有真逸橐

王元美云仲蔚五言古詩調殊不卑所乏精思

又云仲蔚古調本是名家五律亦不惡 李于鱗云仲蔚古詩冲雅有應徐之韻 陳卧子云仲蔚七言絕句其調甚正 詩話七子之教五言必宗河梁建安竊優孟之冠學壽陵之步求其合而愈離當日二子于五古極口仲蔚然仲蔚殊少神解余意尚在盧次榘下二子之言出一時之好未為定論也然仲蔚於歸熙甫文名未盛之時結契最先又論詩不心服于鱗亦有識之士

感懷

生命故有常於世鮮能由天道諒微昧禍福不相讎運
促無修齡吾行將安休高行令世疎寵耀逢厚尤何不
永自持飄飄升九州橫厲越飛泉與彼列仙儔豈效榮

華子跬步相機求

送葉伯寅游南都

朝日揚素影零落滋盈條歸鴈辭碣石嗷嗷屬層霄念
子遵舊都整策陟巖椒北眺窮朔陞東瞻越江潮崇雲
象山岳雙闕鬱岵堯過彼雙闕間冠蓋相游遨四節隨
飈逝茂時乏佳招駿驥棄不收踈足有餘驕非子良見
曠豈復繫場苗信心愜中賞沉吟結清謠共期玄冬月
歡讌憩林巢

送梁伯龍游楚并寄周水部

浮舟入楚江浩蕩千里豁况值清秋時逸興不可遏雲
來巫峽長木落洞庭闊故人渺何許引領向天末

擣衣

重關月色早涼分
夜夜砧聲逐塞雲
淚盡天南與天北
悲笳同是月中聞

盧 柎 八首

柎字少梗一字次梗一字子木濬縣人太學生

有蠛蠓集

王元美云盧少梗如翩翩濁世佳公子輕俊自肆胡元瑞云次梗詩華藻不如茂秦而氣勝之顧玄言云

少梗古體如寒流出谷婉若調軫音隨意適近體如夕禽觸林矯於避贈象逐思馳格高韻雅駸駸元嘉之境陳卧子云山人排蕩自喜頗有越石清

剛之氣詩話次梗詩足以高視四溟

雜詩

高樓有佳婦窈窕青雲端
左蔭綠桂枝右紉芳澤蘭臨
流戲珠浦拾翠游芝田
蛾者眾所嫉蘧蔭翻見憐
棄捐蓬蒿中誰來希令顏
徘徊歲云暮拂衣聊長歎

秋日奉別王元美比部還京

爍爍天上星皎皎巖際月
蟋蟀感夜吟涼飈遲晨發
山木既云蒼江楓亦已脫
遙望百里間茫茫但寥闊
鳴鴉鳴園陬虎豹步庭闕
臨路別所親悵然增華髮
安得瓊芳枝慰我長饑渴

送人之塞上

北風蕭蕭邊馬鳴
君今棄我何遠行
陰山雪花大如掌
黃雲出沒單于營
萬里龍沙那可見
將軍大小七十戰
捷書奏入建章宮
寄我雲中一隻箭

戲寄孟龍川

舊日浮丘伯曾將王子喬周遊乘白鶴接引上青霄大藥留丹鼎天台度石橋不知千載後為爾一相邀

鍾廣漢云此詩

對仗原出襄陽

聞吳吏部少槐哀僕乏嗣飭內入獄侍湯藥

二首

宓子彈琴日山濤謫宦時澤梁弛禁網鰥寡遂恩私未識洪鈞妙應霑造物奇周南王化遠終不負蝨斯
晉室嵇中散陳留蔡議郎彈琴神不去續史恨何長慘澹悲千古淒其滯此方翻思兒女意斷盡九迴腸

哭董縣丞紳

二首有序

丞彊幹任事清苦厲節有古人風壬寅歲長揖

恤刑沈法曹抗救洗冤於柙居甚今茲長往柙安得不悲故詩以哭之

十月黃河穩天寒素舸孤斷雲低不去哀雁起相呼忽暗郎官宿虛傳太史鳧哭君重回首愁色滿蒼梧
列郡開方藥巖牆阻別離蒼生猶有待逝者竟如斯老去傷心地愁邊失望時玉棺誰為斂蕭瑟九原思

李先芳

六首

先芳字伯承濮州人嘉靖丁未進士除新喻知縣徵授刑部主事歷郎中改尚寶司丞升少卿
降亳州同知有東岱山房彙清平閣集

李于鱗云伯承雄才

名重當世洋洋雅音亦復盈耳穆敬甫云伯承詩思秀發綽有右丞之風于無垢云吾里兩李先生其稱詩不同歷下以氣骨合神湛涵

萬有而發以雄迅意嘗超於象之表濮陽以才情赴調融洽眾采而出以和平力嘗畜於法之中壁音之五音歷下則軒轅之鼓素女之琴高張急節鏗鏘驗盪足以駭耳洞心濮陽則昭華之瑄嬴臺之簫蕭誰和鳴可使龍吟鳳下蓋所謂異曲同工者錢受之云伯承未第時詩名藉甚嘉靖七子之社伯承其若敖蚡冒也厥後李王之名已成羽翼漸廣而伯承左官落簿五子七子之目皆不及伯承伯承晚年每為憤盈酒後耳熱少年用片語挑之往往努目嚼齒不歡而罷邢子愿以臺使按吳訪弇州而歸伯承與極論其始末語已目直上視氣勃勃頤頰間拍案覆杯酒汁沾濕子愿遂巡不敢應後為伯承誌墓亦略及之今之論者奉歷下為晉楚抑揄伯承使之捧盤盃而從小邾之後此耳食之口論也陳卧子云伯承為七子先驅而其後不振

詩話伯承與元美于鱗同舍皆故等夷既而七子盛名仰主壇坫元美收之廣五子之列意寔不平晚逃於詞曲觀其詩雋一書詳于淮北遠及巴蜀而獨黜大江以南蓋以吳楚揚粵之間七子實居其五其微意可窺也

擬古 二首

青樓臨大道初日正杲杲感君桃李年使我懷春早佳人念良夕誓結同心好磐石轉有時華池多芳草秋風

薄天雲一去跡如埽篔簹池上魚翩翩籠中鳥性情本非宜况復傷懷抱

高堂列廣讌美酒斗十千絲竹奮清響聽者有悲歡人性豈相殊中心難遽宣諒無黃鵠翼焉敢凌中天延情需所願歲月忽已殫要津何熠燿駑蹇徒迤邐達人貴自我珍此勞華年

鄱陽湖

吳人臨古渡湖水接天開一夜南風起扁舟萬里迴波漂星子縣雲沒大孤臺却望蒼茫裏匡廬秋色來

早春懷元美

蘄王簫鼓日紛紛雪霽遙看玉笥雲借問江城春幾許

梅花落盡不逢君

由商丘入永城塗中作

三月輕風麥浪生
黃河岸上晚波平
村原處處垂楊柳
一路青青到永城

再過玉河隄

馬蹄日日逐紅塵
白髮青山應笑人
昨日玉河隄上過
杏花開盡不知春

吳維嶽 七首

維嶽字峻伯孝豐人嘉靖戊戌進士除江陰知

縣徵授刑部主事出為山東提學副使擢右僉

都御史撫貴州有天目山齋歲編 王元美云吳峻伯如子陽在蜀亦具

威儀又如初地人見聲聞則入大乘則遠又云峻伯詩小巧清新足炫市肆無論風格 穆敬甫云吳公結社西曹詩中奇語往往驚人詩話峻伯如鉛刀土花不堪灑削然其五律頗具岑嘉州張司業風格句如關河春雁少風雨暮鐘多細雨來因晚空山到已秋清曉涼帶葉零初收市秋江正長潮潮生風聽急江遠雨看無澗水斜牽篋林烟遠出村沙頭飛燕子市上賣櫻桃鐘殘寒山外雁沒遠烟中較之明卿子與輩故自勝之

寶應湖即事

遠水映空浮星分蘆荻洲
漁鰕湖上飯簫鼓雨中舟
擊楫成孤詠揚帆出亂流
春還信可樂前路是揚州

贈沈丞之甌寧

一官知可薄其奈武夷山
正好乘春水悠然出古關
縣齋峰影下吏事酒杯間
計爾傳詩日初游九曲還

立秋後一日雨中登樓

涼雨蕭蕭下江城昨已秋潮聲入官舍山色帶書樓鼓散堂前吏帆歸海上舟喧聲聽晚市聊用遣鄉愁

晨詣玉華山摘桂花口占

凌晨採花遊蕭然遇山雨登閣啓雙扉新泉響何處

江上

淒淒江路風曖曖遠村樹愛殺鳴榔人長歌入烟霧

孝豐西圩道中

澗泉遶路十里石屋樓雲數家何處微風醒酒溪南紅

杏新花

發南豐

山程細雨桃花店關路長橋楊柳溪何事錦囊朝夕載

南豐春色總堪題

歐大任 三十首

大任字楨伯廣州順德人以歲貢選江都訓導

遷廣州學正入為國子監博士遷大理寺評事

終南京戶部郎中有思玄堂旅燕浮淮秣陵北

轅南耆游梁西署輶中詔歸蘧園諸集 江伯玉云楨伯意氣

溢發一歸雅馴可謂治世之音 朱用晦云楨伯樂府近太康古詩師鄴下歌行準嘉州間出青蓮語近體羽翼盛唐七言佳境頗類龍標錢受之云自王李倡七子之社嶺南則梁公實與焉已而元美進楨伯於廣五子進維敏於續五子梁與歐黎皆出黃才伯之門讀書續言並有原本雖馳騫五子列而詞氣溫厚頗脫張叫躑之習識者猶有取焉 李舒章云楨伯詩如新裁貢錦雖機杼未古而時有鮮藻詩話楨伯吟豪過多先後發離年分地別不盡流傳嶺外歲丁酉吾鄉曹侍郎潔躬出領粵東左轄思嶺南詩選屬予甄錄予從楨伯孫博士正式借足本正式請予持擇稍寬予東版載歸點以朱墨後數載不知何人竊去深以為憾邇年復理明人詩念之不能釋懷忽從戴生筠

書屋見之言獲諸質庫中不禁狂喜因載為施鉛錄古今詩三十首吟誦數過似不為濫正式雖某有宿草亦足慰於地下矣

短歌行

樂樂自生人窮反本生世幾何倏忽已晚去者日疎來者日親水流同源木生同根父母兄弟豈伊異人况有旨酒云胡弗歡白日冉冉明膏繼夕調軫鼓絲樂我親戚春有催耕秋有促織歲事方勤及此游息今日同堂明日異鄉聽我短歌心如之何

怨歌行

高臺風蕭蕭下澤波湛湛春草綠已萎遊子歲月深駕言御松舟寫我繁憂襟昔來睢鳩鳴今已蟋蟀吟遨遊將安歸弭櫂迴塘陰代馬嘶隴首塞鴻翔漢南我欲往

從之江永思難任佇立睇川塗一寄瑤華音行行采蘭苔聊以紓我心

烏棲曲

月落未落烏將棲可憐夜夜夜半啼閨中少婦停梭泣淚濕鴛鴦不成匹

泊樅陽眺覽盛唐遂憶漢武之游

行役屆皖城放舟下樅陽原隰鬱膺膺江波浩湯湯憶在元封中君王狩朱方大江深且廣及茲一葦航彎弧射蛟臺皇武何可當宸游事既往六合無回光不見樓船還空餘蕙蘭芳追昔有虞氏恭已垂衣裳聖人重無為君子貴豫防覽古動淒惻延佇增彷徨

汎滇江至修仁水尋范雲飲水賦詩處

陸陟心苦艱江行意超忽揚舲恣擊汰理榜欣乘筏昔
聞范內史於焉自怡悅賦詩散鬱陶飲水辨清澗今游
屬暮春遠放遵南粵三楓睇已遙五渡嗟應沒爰思雒
雉馴尚想甘棠芟命駕稅山椒弭蓋依林樾明霞帶遠
巒瑞靄屯崇碣樊薄粲朱櫻原陵苞綠蕨感茲時物遷
懼爾芳馨歇代更道豈殊事往迹空揭淒淒懷古吟心
賞不可越鴟夷迴泛湖子牟悵懷闕采蘭向中洲眷此
何由達沿洄發擢謳愉樂陶嘉月

南越武王趙佗墓

故國多荆榛壘壘帶丘隴北睠天井岡莫辨尉佗冢緬
惟稱制時中原已雲滂閉關并揚粵畫句賦秬總閩蠻
漸東羈甌駱盡西擁黃屋竝漢儀威邊自尊寵陸生踰
嶺來班輪再南軒奉藩謹上書正極衆星共桂蠹貢雖
入湟溪道仍壅志遠蒿里催運往朝臺聳黍苗被隧塗
麀鹿交町疇金鳧幸不飛銀海豈能湧登壘躑躅歌空
有牧豎踵誰爲雍門彈千秋淚洶洶

劉王郊臺

五季亂豺虎曆數未有歸南漢驕自王帝粵保南陞白
龍表上瑞圜丘祀蒼祇乾亨首紀元升壇列金枝薦德
羞幣玉滌牲黷郊犧上帝肯居歆祝史虛陳辭君昏社
已屋廢臺委山陂燔柴不復登茂草鞠荒基魯侯昔僭

郊已歎周公衰甘泉與雍時秦漢多陋儀矧茲蛟蜃國
禾黍豈足悲

十四夜元白維敬見過

曖曖天宇豁涼夜皎如練鏡彩未盈規清輝遠彌見先
臨太液池却麗昭陽殿須臾出漸高歷歷指燕甸零露
混金莖嚴更促銀箭登樓枉嘉賓鳴佩總時彥列坐引
濁醪行厨媿豐膳盍簪旣非偶明德夙所眷共舒南渚
情寧羨西園讌鄙劣謝久要期爾迴光眄

十五夜遲元白維敬翫月

昨游有餘興今賞不可忘况當圓景麗秋中氣清涼披
衣坐前楹瑤空已飛光凝華映連觀流輝明洞房夫君
幸伊邇策馬非異鄉懷賢切饑渴皎皎恒相望願從聆
徽音示我以周行

端州凱宴行

自從大羅山賊來虔劉婦女驅嬰孩千家萬家室如埽
倉困杼軸皆塵埃幕府專征有成算漢軍達軍勢如電
飛符三楚調狼兵五將前驅我軍殿笳鼓長麾入瘴茅
空巢不費諸軍箭羽書馳報請芻糧士飽馬肥思一戰
西風鏡吹凱歌歸數十俘囚泮宮獻誰知首級半農商
血裏淋漓那忍見椎牛醜酒饗歸士曠悍狼兵更愁怨
金花錦帳排軍門諸司盡向端州宴吁嗟此事真兒戲
曹幕諸山賊猶熾嶺南無歲無征戎願君勿似大羅功

三河水

三河水萬軍淚淚滴三河水不流胡笳吹落薊門秋河
水流不住胡笳過何處誰使十年來移營兩屯戍君不
見獷騎已馳牆子關漢軍尚哨熊兒峪

次韶州

臘月度湏水繫舟韶石間山高連漢徼樹遠接秦關禹
甸通諸粵堯封盡百蠻九成臺下路猶想翠華還

夏日同陳世鳴憑虛閣讌集

故事南朝日風流憶謝墩薜蘿延翠靄簫鼓送黃昏鍾
阜深藏寺玄湖曲遶村帝城瞻王氣猶自護朱門

得黃希尹金陵書

送君白門去五載尚為郎握手知何日題書問故鄉潮
聲江浦鴈秋色石城霜一葉西風外無因到洛陽

入峽

一峽束江水千峰不可攀廬猶匡氏宅壁擬謝公山有
跡游方外何心出世間儻逢乘鯉客明月櫂歌還

嶺上謁張文獻公祠

南人誰爰立公始相開元忠豈酬金鑑恩空下劔門衣
冠通德里桑梓曲江園父老修秦臘還來奠桂尊

除夕寓九江官舍

餞歲潯陽館羈愁強笑歡燭銷深夜酒菜簇異鄉盤淚
每思親墮書頻寄弟看家人計程遠應已夢長安

李符卿伯承左遷亳州夜同黎祕書惟敬吳侍御
約卿往餞得長字

殷勤一尊酒相送意何長薄宦投濠上歸心向濮陽使
星珠斗外卿月玉河傍持慰山東客銜恩異夜郎

謁文信國祠

即柴市
故蹟

憶昔南冠日厓山恨未忘魂沉柴市月淚盡薊門霜白
鴈銜江草黃龍逐海航中原冠劔在歌舞待巫陽

十月都下感懷寄諸弟

生計由來薄兵戈日轉愁鄉書經歲絕客淚幾時收星
暗臧宮劔霜凋季子裘老親衣線在辛苦事防秋

萬歲山

一名百
果園

五岳來朝日三山路不迷長楊秦苑北盧橘漢園西珠
斗凌空近瑤峰入望齊萬年同聖壽何用訪丹梯

龍舟浦

簫鼓中流發秋風散浦烟琳池新樂府汾水舊樓船賞
勝觀濤日游非習戰年甘泉思扈從回首濯龍川

南臺

下有水田村舍先
朝曾於此觀稼

西內風烟異南臺見水田艱難曾稼穡淳朴自山川農
舍朝炊裏江鄉夕照前穀蠶勞睿藻幽雅定同傳

同黎祕書劉山人遊西山經玉泉山池亭望西湖
竝馬今朝路西行訪石經山泉浮鉢綠湖草映袍青積
玉迷春澗飛花入暮亭十年江上客烟雨憶揚舩

送曾子澄之塞上

曾是征南將今隨定遠侯白雲仍漢壘春色過邊州柳
拂漁陽騎笳清紫塞樓酬恩知有日談笑看吳鉤

九月十五夜月

瑤草三秋色金風一夕寒書緣多難絕月在異鄉看淒
斷驚霜角遲迴望露盤刀頭今未定誰最憶長安

曉出玉泉山經西湖

玉泉散作鏡湖波聞道宸游向此過宮闕三山浮弱水
樓船千里度星河白麟朱雁無消息瑤草金芝近若何
詞客昔年誇扈從琳池花似漢時多

嶺下酬蔣宋二使君見過

梅花嶺下幾擔簦敢向中原論代興置驛豈期縫掖貴
乘船猶媿孝廉稱虞廷此日咨州牧漢相何人起郡丞
聞道長安推轂地歸朝行見璽書徵

朝漢臺懷古

甌駱猶歸粵河山尚隔秦誰令南海尉終作漢藩臣

巴陵劉宗道自吉安與余同舟途中言別

雨中同上吉州船分手潯陽思惘然明日思君是何處
萬行烟樹入湘川

王道行一首

道行字明甫陽曲人嘉靖庚戌進士官至布政
使有桂子園橐

呂二山人自上黨以詩見貽贈此却寄
山陰夜雪興何如客去遙天斷鴈書曾許王生重結韞
未應梁苑倦驅車林開叢桂香飄席臺倚千峰草結廬
遲爾憑高一杯酒漫從張翰問鱸魚

石星一首

星字拱辰東明人嘉靖己未進士除行人選吏
科給事中坐言事杖為民尋起原職升尚寶司
少卿歷大理寺左右丞進少卿出為南太僕卿
擢左僉都御史協理院事進左副都御史轉兵
部左右侍郎升工部尚書加太子少保尋改戶
部復加兵部削籍有東泉集

同穆敬甫舟中作

詩話少保雖與余州聲應氣求然風雅道遠余州與陽曲王明甫齊進
之續五子之列月旦如是初不為千秋起見止任一時之愛憎而已

回首雲深薊北臺不緣五斗賦歸來江湖我適扁舟興
廊廟君終濟世材寒色侵人鄉夢斷濤聲入夜錦帆開
平生擊楫成何事起向燈前歌莫哀

黎民表十六首

民表字維敬從化人民衷弟嘉靖甲午舉人選
授內閣中書舍人出為南京兵部員外終布政

司參議有瑤石豪

胡元瑞云維敬近體深觀莊嚴類公實而
老健過之李時遠云瑤石早受學于黃

泰泉其詩自建安下逮齊梁靡所不合和平典雅
風韻乎盛唐遺響陳田子云維敬詩清華切秀
詩話瑤石詩讀之似質悶而實沉著堅韌元美所取續五子無媿大小
雅材者僅此一人而已其在都下借龍游童佩子鳴永嘉康從理裕卿

江陰鄧欽文徵甫武陵陳忘育仁甫新城沈淵子靜南昌楊汝允懋功
靖江朱正初在明麻城丘齊雲汝謙時昭李言恭惟寅無錫安紹芳茂
湖蘭溪胡應麟元瑞壽州朱宗吉汝修凡一十三人爲
西山之游縉紳韋布各參其半匪徒好事洵勝引也

游仙 三首

我思忽不愜藐然隘中區
凌山度瑤碣肅駕自雲衢
遨遊清都闕神焱吹我軀
上帝垂藻旒羣后驂龍趨
羨門進仙藥王喬授玉書
餐和鍊真魄精神遊六虛
自握無爲寶年壽安足虞
濯足紫泥海晞髮朝陽阿
雲車載玉女皓齒揚清歌
參差麗霄漢玉麟隱相和
駕言憩玄圃貽我瓊樹華
光儀忽以逝茲意成蹉跎
峒峒閭風岑汎汎蒙汜波
仙才諒非偶浩歎將如何

山林非所託所思在神州
寓目八紘外經過華池幽
神光颯然至青鳥從我游
靈妃奉玉觴清謠自相酬
歡娛未終夕曜靈不可留
山川負繇邈白雲良悠悠
安得不死藥千載復來求

虎頭巖

松徑先未黯賞心詎云釋
攬勝陟崇厓褰衣履危石
雲構方蒙茸乳竇正浙瀝
險逾呂梁壑漸異天井壁
仰接驚猱棲俯視飛鳥迹
綠帙晝常扃丹光夜逾艷
杳杳曛烟生濼濼冬霰積
功非夸娥棹奇假巨靈擘
棲真事巖耕倩爾飛鳧鳥

同丁戊山人游白雲寺

流觀遍炎燠結賞自員嶠積陽熙層厓凝陰豁林杪雲
構何厓屨乳竇自窈窕瀕洞出谷雲淵滄瑩神沼稍疲
暫憩石選勝益躋表欄楯寄躡踞軒牕瞰深窅猛籟發
鴻音寶輪晃餘照龕以曇花覆階將蕙草繞詎謂劫灰
餘遂成夷原燎棟橈芝菌生瓦圻甃聒嘯金薤剝石幢
承藥遺丹銚惠遠豈復招巫陽不可叫蕭辰命良儔蘭
觴展奇眺感茲玄運徂念爾冲規劬關河閱舟楫雲雨
乖言笑潛蚪媚烟霄冥鴻避矰繳勉敦谷口盟無貽北
山誚

予告出京師貽同好諸子

雙鳧戲中沚羽翼相因依眷言二三子疇昔同裳衣
婉未及終雲雨當乖離往嬰鵠原戚今懷機杼悲貞悔
難具卜榮賤同一時衆人各有營疇能恤其私君子重
明義申以皎日期采擷異葑菲以報瓊玖貽

香山寺

却月橫香閣祠星隱紺臺殿隨山勢轉池向水源開雙
闕浮雲斂千林返照來鶴岑清絕處心賞信悠哉

留都

幽薊稱巖甸重襟亦在斯尚紆南顧策數費北門師霜
悴青苗盡秋深赤羽馳誰能如賈誼流涕向明時

豫章江行

路已經吳越舟還溯豫章洪濤撞遠岸獨鳥下危檣地

明詩紀卷四十一
近長沙濕山連粵嶠長所思非遠道猶復歎殊方

同黃淳父登雨花臺

高座翻經處捫蘿試一登羣峰當暮斂萬象入秋澄樹
色分蕭寺松風起漢陵傷心烽火日樓櫓在西興

楊祠部宅送陳玉叔之淮安

故人遙擁傳炫服且還鄉芳草經吳綠清淮入海黃離
襟分夜月官燭照西堂祇益風塵夢隨君郢路長

峪口

翠削龐峰峻高蟠鳥道孤東西分幕府風土入穹廬牧
馬閑千匹當關用一夫傳聞漢諸將猶議塞飛狐

紫荆關

徑轉蛇盤險雲連鳥去長山桃微著紫沙柳不成黃重
鎮臨天府神功劃大荒金城誰獻議老作尚書郎

橫翠樓元將

高樓當絕塞春望轉氤氳百戰全燕地千重大漠雲控
弦無掠騎飲羽憶將軍老去親戎馬悲笳向夕聞

別吳而待

戀關心仍在還家路不迷淒涼弔古意疲馬入青齊

友芳橋

隔浦風烟暗桃花自不迷壺觴憐小阮時向竹林攜

趙用賢一首

用賢字汝師嘗熟人隆慶辛未進士選庶吉士

除簡討以建言杖為民起春坊贊善歷南京國子祭酒升南禮部侍郎召還改吏部卒贈禮部

尚書謚文毅有松石齋集

錢受之云文毅少年頗警警弁州晚而北面稱弟子弁州

亦盛相推挹作續五子詩及之而未五子復居首焉

陪祀昭陵紀事有作

瑤壇晴雪淨春空
劍佩聲沉苑路東
霜露每勤憂聖主
貂璫無復肅齋宮
通原燎火分宵白
拂樹霓旌映曉紅
寂寞翠華誰望幸
惟餘金粟鳥呼風

李維楨

四首

維楨字本寧京山人隆慶戊辰進士選庶吉士

歷南京禮部尚書有大泌山人集

錢受之云本寧洪裁豔詞援筆揮灑又能

歌曲隨以屬厭求者之意

其聲價騰涌而品格漸下

詩話本寧如官厨宿饌麋鹿肥麋

雖膾膾具陳鱸羹雜進無當于味

太和雜題

文祖初封嶽經營十二年景光如有見
議禮不相沿
畚畚三軍舉
泉刀九府捐
龍額垂過膝
象帝髮鬢然

南都

三首

舊邦偏霸一隅雄
帝命維新自不同
再闢乾坤清朔漠
雙懸日月啓鴻濛
春開蒼震青陽後
斗直黃旗紫蓋中
率土王臣修職貢
江流萬里亦朝東
親提三尺渡江來
宇宙東南帝業開
不盡風雲生沛澤
方升海日見蓬萊
河山兩戒朝宗地
草昧諸臣將相才

高廟神靈時出王龍文五色正昭回
旌旗劔佩擁椒除尚想戎衣革命初
綠草不侵雕輦路紅雲常護紫宸居
金銀宮闕三山外烟雨樓臺六代餘
誰謂長江天作塹八荒今日共車書

屠隆九首

隆字長卿又字緯真鄞縣人萬曆丁丑進士除
穎上知縣調青浦升禮部主事歷郎中有由拳

白榆采真南游諸集

錢受之云長卿令青浦延接吳越名士
青簾白舫縱浪柳浦間以仙令自許在

郎署益放詩酒西寧家小侯少年好聲詩相得懽甚兩家肆筵設宴男
女雜坐絕纓滅燭之語喧傳邸下中白簡羅官壯年不自聊縱覽關塞
尋遨遊吳越七閩間長篇短什信心矢口而出所傳由拳白榆采真南
游諸集皆未嘗起草之筆自謂采真者十之三乞食者十之七蓋實錄
也 陳際子云緯真詩如衝煩駢舍
陳列壺觴頃刻辦就而少堪下箸

詩話長卿才非不高而縱情奔
放記云不知所以裁之者也

彭城渡黃河

彭城臨廣岸俯仰霸圖空白日照殘雪黃河多烈風所
嗟人向北不似水流東回首滄溟曲山山雲霧中

北地

不識漁陽路愁心莫問程大都行曠野偶爾見荒城原
樹衝人立冰沙映日明但逢茆店宿明發又孤征

潞河晚泊

迴浦落帆盡長堤帶郭斜暮烟平吐樹春雨薄沉沙白
艇藏漁市黃茆覆酒家一瓢雲水外不復問年華

江北謠

千錢與唱歌百錢與賣酒本是青州人家住黃河口

江南謠

日落晚天碧潮來江水渾漁燈楓葉下不覺到柴門

竹枝詞 二首

木槿編筐土築牆田家住在水中央四月穿綿六月冷
門前夜夜稻花香
水仙愛種水仙花一灣江水廟門斜女冠夜送小姑出
四野無人好月華

真如寺

招提信宿十年前香飯清齋不取錢佛首藤蘿僧舍雨
重來歲月總茫然

渡黃河

野曠天陰日欲西北風吹雪雁行低黃河渡口行人少
一路寒沙沒馬蹄

魏允中

四首

允中字懋權南樂人萬曆庚辰進士除太嘗博
士遷吏部主事有仲子集

舍弟東視海上諸郡余西歸

共被復今夕分攜在今朝子車向北海我馬投西郊疾
塵蕩山郭密樹迴河橋相望忽相失憂來不假招芳華
色黯澹鳴鳥聲蕭條加餐縱努力何以慰寂寥

舟中贈泰峰先生

漢署高題柱周官藉理財詔從雙闕捧帆渡九河來驛
路霜楓盡家筵露菊開無令淹使節東閣正憐才

周生歸黃州

涼風吹客帆落日過湖南握手空相送離心不可堪片
雲縈楚岫一葉下江潭何地偏相憶朱家酒夜酣

寄周元孚

為郎仍被謫世事那能知才子原無罪明君未有私是
鄉芳草日江路落花時五嶺流人徧非君獨可悲

胡應麟

八首

應麟字元瑞更字明瑞蘭谿人萬曆丙子舉人
有寓燕還越計偕巖栖卧游兩都蘭陰邯鄲華

陽養疴婁江白榆湖上青霞等集合為少室山

房豪

王元美云元瑞才高而氣充象必意副情必流暢歌之而聲中
宮商覽之而色薄雲漢以比開元大曆亡勿合也 王敬美云

元瑞力追大雅絕不為柔曼浮豔兒女子之態故其詩多感慕意氣敦
篤友誼有燕趙烈士風 曹子念云元瑞詩洪纖近遠觸手成象必麗
大雅 屠長卿云元瑞近體無音不亮無思不沉無骨不動要其變化
離合不盡出於手鱗也 陳卧子云元瑞如中賈張肆不皆珍異却無
物不有又如老樂工
清濁輕重都傳弟子

詩話長律至百韻已為繁富矣元美哭于鱗乃增益至一百二十元瑞
哭元美則更倍之蓋感知己之深不禁長言之也詩數一編專以羽翼
危言虞山錢氏語之太甚觀少室山房筆叢沈酣四
部自不失為讀書種子詎可因詩數而槩斥之乎

雜詩

矐靈薄嶮岷光景忽已夕圓魄猶未升明星爛然出寒
蛩號我前蟋蟀鳴我側涼風起庭戶樹木何蕭瑟佳人
期不來延佇空歎息寧知三歲心為子長惻惻

秋日偕同志游金華

屈子歌遠遊尚平有遐慕顧謝青雲人言尋赤松路歷
覽窮幽深冥探愜情素澗壑捫嶽岑林巒涉迴互崖傾
黃葉積谷轉垂蘿護高峰散餘靄峭壁屯寒霧娟娟初
月昇隱隱微陽暮長謠欽昔蹤獨往懷蹇步慮由忘物
超道以遺榮悟迹契容成公神交子支父徘徊北山文
惻愴淮南賦睠彼丘中人迴飈對巖戶

贈高深甫

最憶高常侍生平樂事饒千金求驂駟十院貯紅綃古
蹟留三代新聲和六朝湖頭明月滿無夜不吹簫

自嚴灘至新安途中紀興

一灘高一丈

諺云一灘一丈新文天上

灘盡到天都疊嶂雲飛動陰厓日

有無辛夷殘紫落躑躅亂紅敷獨少行雲廟分明入峽
塗

出塞曲

大獵漁陽罷椎牛上谷營酒闌飛騎去夜奪受降城

胥口

落日溪水寒漾舟殊未已西冷何處村望望茶烟起

寄江蘿館

朝夢江蘿開夜夢江蘿落如何二十年不到江蘿閣

塞下曲

平沙一望隴雲開玉笛飛聲夜轉哀萬里朔風吹不斷

梅花齊落李陵臺

王世懋 四首

世懋字敬美太倉州人世貞弟嘉靖己未進士
除南京禮部主事遷尚寶司丞出為江西參議
歷陝西福建提學副使升行太嘗寺少卿有奉

嘗集

穆敬甫云敬美逸氣縱橫詞采豐蔚 胡元瑞云敬美拔新標
於四家七子之外勁逸適爽宗吳謝李方之茂如以配哲兄誠

無媿色 錢受之云敬美弱冠稱詩手鱗呼曰小美贈書元美云小美
思火攻伯仁奈何不善備之其論詩猶推徐昌穀為子業二家以為更
千百年李何尚有廢與徐高必無絕響其微辭謂詩雅不欲奉歷下壇
站則於大美亦可知也 李舒章云奉嘗詩如鳥衣草少粗有風格不
足對揚 父兄

詩語敬美才雖不逮
結景習氣猶未陶溺

初夏田家

本爰園林居遂與塵世隔欹枕過鳥啼初陽在簷隙攬
不臨前除游目恣所適藹藹千樹交紛紛里烟白清渠
已新苗高壟尚餘麥雀乳深茅茨魚防間荏澤野夫荷
鉤語小婦當窗繡周覽物候齊憺焉忘朝夕薄暮池上
歸苔痕亂深屐

人日袁孝功見過

今年人日百不娛客游金陵家在吳金陵春事亦不薄
有官何似當年無清溪館前日欲哺誰其過我袁大夫
喜是舊日高陽徒十千斗酒不用沽牀頭春甕足百壺
春陰滿地雲糝糊渡口桃花未著葉門前楊柳難藏烏
金陵少年紫驪駒有酒只過秦羅敷飛光荏苒歲易徂

二毛便欲侵頭顱男兒纔拄馬曹笏河山已限黃公壚
仰天且莫歌嗚嗚尊中酒盡可復呼霜落烏啼更明日
摧眉還向府中趨

廬山雪

朝日照積雪廬山如白雲始知靈境杳不與衆山羣樹
色空中斷泉聲天半聞千厓冰玉裏何處覓匡君

逢友

歸來雙鬢兩蕭然見画猶能記昔年風雨一船曾泊處
借人燈火草堂前

土錫爵

三首

錫爵字元馭太倉州人嘉靖壬戌賜進士第一

累官少保兼太子太保吏部尚書建極殿大學

士贈太傅謚文肅有集

詩話元美標榜詩人於五子四子
外以其弟敬美及文肅稱二友焉

題成祖四駿圖

錄二首

龍駒

正勒繡纏鬃天廡出真龍報恩苟得所寧論劒戟鋒是
時元戎方首路霜毛血濺仍馳騫將軍抽矢前致詞願
言不忘射鉤時

飛兔

白溝昔合圍龍駕忽三易不成玄武陣寧標飛兔跡鬚
鬣漬血汗成珠此時七萃紛前驅即今宛馬西來道試

看茫茫白溝草

壬辰秋日高郵待詔即事

慚媿春明別依然物色新風雲真遇主骸骨豈謀身市
駿黃金盡籌邊赤羽頻總關游子念其奈倚閭人

明詩綜卷四十七

明詩綜卷四十八

小長蘆 朱彝尊 錄

安宜 張易汧 緝評

徐獻忠 一首

獻忠字伯臣松江華亭人嘉靖乙酉舉人知奉
化縣及卒友人私謚曰貞憲先生有長谷集

靜志居詩話長谷以作者自期持論謂詩人之作代出意匠以增前人之能旨哉言也其比六朝聲偶品唐詩原樂府皆有功後學惜其言不盛行詩亦冲澹無累句特少警拔耳

俞氏水樓

故人江樓月照見千里心遊子未言歸清光被滿襟西
陵隱簷際南湖澄夕陰持杯向木末未捲幔對遙岑悵然

不能去徒令江水深

沈燭一首

燭字世明一字伯遠嘉善人嘉靖乙酉舉人有石聯遺橐

送顧梧石之衡州

瀟江路轉千峰碧冉冉蒼雲拂樹低此去臨風憶回首月明江上鷓鴣啼

顧聞二首

聞字行之吳縣人嘉靖戊子舉人自號九巖山

岳東伯云九巖才華瑋麗鋪敘豐長究其所歸靡不有自至於染翰人稱其能並美者矣

折楊柳

芳艸接金隄垂楊綠更齊夕絮離天遠春絲別霧迷曲中青鏡改愁畔紫騮嘶紅樓歎少婦腸斷玉關西

夜泊崔鎮聞笛

雲落清河夜天橫片月涼江樓莫吹笛明日是山陽

孫宜十首

宜字仲可華容人嘉靖戊子舉人有洞庭漁人

集顧玄言云漁人新聲奇調在李唐二孟之間河嶽隱淪之夏秀者孫宜得杜尚余觀其詩割擬字句了無意味求杜之片鱗半爪不可得而况向乎

詩話洞庭漁人胡氏詩數稱其學杜然實源於大李故論詩絕句云我愛風流太白豪萬言珠玉在揮毫特其運筆癡重斯與謫仙人不類耳其於空同大復少谷太初迥功而原皆其所取法滔滔莽莽下筆不休亦楚產之傑出者

十三夜月

良晤既匪易佳節亦復過今夕非昨夕光景忽已多霏
霏失玄霧濼濼增金波昔眇猶室隅茲升眇庭柯當扉
萬象啓側戶三星羅蕭爽候愈寂沉冥夜如何興言悅
至賞眷此成清歌

十四夜月

循環廼常度盈昃亦至理幾望已在茲持盈有深旨天
運恒自然人事安足恃未滿溢漸形欲盛衰伊始倚伏
本貞機損益妙良軌志以道自虛情緣欲斯侈守義焉
所窮法乾信云美

送周氏

黃河逾東逝白日淹西沉人生不滿百奈此世慮侵貧

賤豈得渝富貴安可欽浮榮竟杳漠要路恒崎嶇邵侯
悅瓜田陶令謝華簪遠觀信有及古道良足箴得喪匪
人爲憂樂由我心願言返初服聆我山水音

菱港

結軫倦久疴嚴裝理前遊山行稍云疲水宿良所由弭
權臨別浦揚舲逝安流波迴路曲折雲霽天沉浮霜荻
響近渚風篠鳴長洲沙翔去來鷺岸並連拳鷗澤蘭晚
漸垂江菼秋始柔遵嶼乍離合凌颺屢優游擊楫情已
乖乘桴興將倅即此締暹盟抽詞贈同舟

行視別業禾稼作

狗祿返塵軌臥疴遂幽垆爲圃竟不習學稼鮮所明薄

田委僮僕嬾性謝經營春陽始云改夏序亦以征輟翰
越城棲振衣事郊行旣暢景物麗復感禾黍盈雲葉被
畛秀風花覆阡平修渠濯細流佳實播初馨堅好類周
穡耗蠹殊魯螟利婦足遺穗築塲喜新晴澤黍我私及
秋荷今歲成麤糲甘自嘗飽煖奚更營且免洛陽歎聊
結杜曲盟

王生入山謝事戲簡

疾風吹雲暗江縣東城之雷北城電城中一雨絕可憐
十日不見王生面昨當折簡傳深意咫尺山城爾須至
楊雄艸玄亦避人侯葩載酒曾多事

秋日歌

二首

秋風忽吹洞庭艸萬壑千崖覺秋早江邊白石迴波濤
湖上蒼雲亂昏曉少年日月易搖落即日繁華已枯槁
人事天時合併催風塵何必長安道

秋風淅淅吹茅屋東流之水西日速地連南極北極雲
葉落千山萬山木江上漁人罷釣歸臨風拋擲綠荷衣
黃塵碧海真漂泊白石滄波誰是非

同諸友遊郭曲

地勝因湖得堂幽對野開晚風吹笛起秋水抱城迴溪
友留魚去鄰翁送酒來爲言九日近引客試登臺

十三夜月東謝子

今夕江樓月能添昨夜明苑雲寒自斂城角霽尤清露

警花間雀風微樹杪螢百壺高興在端坐待君傾

陳津五首

津字道通長洲人嘉靖戊子舉人仕至兵部職
方郎中有莪齋集

詠史

貧賤希富貴富貴履危機赫赫丹徒子當樞思布衣五
鼎有覆餗一瓢堪樂飢可知東門犬不若西山薇火烈
飛蛾焦泉深鯉魚肥胡為即顛越而不鑒於微不見成
連子千載揚音徽

怨詞

明妃絕世姿少長君王側一忤丹青人咫尺成離隔何

况窮居士欲望君王識

石山驛

四野動力作荷鋤紛出村開塍望新沃喜見前山昏嵐
氣藹林杪春風搖艸根丘中有來信燕子入衡門

螢

分將光自照肯擬暗中投寂歷依書幌分明點客舟露
涼深映竹風定直衝樓不恨飄零晚終隨大火流

陸冰修云五六

清警

燕子磯

燕子何年集釣磯春氣不見舊烏衣空餘芳艸迷前浦
長自寒潮送落暉刺眼野桃臨岸發多情山鳥傍人飛

獨慚白髮紅塵客此日披襟對翠微

鄧遷一首

遷閩縣人嘉靖戊子舉人官嘉興通判

感秋

白露下亭皋涼風吹綺陌一夕芙蓉花紅芳變瑤碧

包桐一首

桐字子同號同谷鄞縣人嘉靖戊子舉人官知縣

送屠秋官國望復任留都

寒江渺渺煙霞開揚舸西指鳳凰臺大夫十年不得調
風塵千里胡為哉銜杯欲別別最苦拔劍當歌歌莫哀

壁水貫城當咫尺相逢還許坐莓苔

黃省曾一首

省曾字勉之吳縣人嘉靖辛卯舉人有五岳山

人集

皇甫子循云勉之思劇沉幽語罕仍蘊宿構非工食時為敏

徐紹卿云勉之才藻富捷篤尚深華徐子元云勉之詩宗六

朝如安行月明獨鶴夜警王元美云黃勉之如假山池雖爾華整大

費人力穆敬甫云山人從空同遊刻意為詩遂成一家岳東伯云

江南曲

旖旎綠楊樓儂傍秦淮住朝朝見潮生暮暮見潮去

史元中一首

元中號鹿泉鄞縣人嘉靖辛卯舉人魚臺知縣

有青蓮集

詩話鹿泉知魚臺縣事值歲大侵盜賊起有簡瑞者為盜魁善運稍馳馬出沒官道鹿泉以計縛之簡臥庭下瞠目曰吾左手持稍右短兵橫行千里間今為書生掩取天也公笑曰汝輕書生耶即起著短衣持其所用稍運之左右迴旋如舞匹練忽稍斷為三擲示簡曰汝稍豈足用耶簡叩頭稱死罪乃繫之獄至冬月將論決簡求見公曰身亦山東男子不敢負公乞假十日一生別老母公即縱之去眾皆懼及期先一日簡就獄離魚臺三十里為獨山大盜劉儀久嘯聚其中有眾數千開府曾公銑議進剿以公為前鋒既擇日陳兵禡祭畢公知獨山有謀者在軍乃命植一竿百步外公手挾矢誓曰某以書生任將兵若一舉滅賊當三矢中此竿時萬目齊注監司諸將俱色變公從容三發三中呼譟震地是日公即察得謀者三人釋其縛賜以美酒食笑謂曰汝來觀吾射耶謀者鼓栗盡吐賊虛實及所入獨山往道公立提兵襲其寨擒劉儀還曾公大喜方論薦公會曾公遷制三邊尋為相萬所害赴市鹿泉歎曰事尚可為耶即日挂冠歸里時年四十二家居復四十年守令思一造見不可得老益貧惟賣文以自給云

秋思

世事吟邊改流光醉裏過歲收頻下下公賦益多多有

暇窮漁獵無憂隱薜蘿康衢終見及擊壤續堯歌

林垠一首

垠字天宇閩縣人嘉靖辛卯舉人選授桂陽知州遷撫州同知終戶部員外郎有野橋集

拒馬河作

拒馬河邊驛路長蜚狐口外又斜陽春光已過六十日不見花枝空斷腸

唐鉞一首

鉞字君錫蘭溪人嘉靖辛卯舉人任揚州府同知陞楚府左長史

江行

客計方歸越 征橈更背吳 風螢臨水亂 江月向人孤 洲
已過迷子山 行及望夫可 憐清夜色 強半在長途

黃中 三首

中字文卿 處州人

蘭臺法鑿錄作遂安人 浙士登科考同

嘉靖辛卯舉人

授鉛山知縣 擢貴州道御史 出為山東按察副

使有南窗紀寤集

田叔禾云 括蒼詩派倡自郁離子 自郁離子歿 作者無聞 嘉靖中有黃西野出焉 可

當作者 李時遠云 副使為詩不泥法度不主 故常冲融渾化意境兩忘 識者謂其眾體皆備

長相思 二首

妾夢一處所 積雪滿空山 覺來向人語 道是玉門關
萬里傳郎信 開緘喜欲狂 報得郎身健 遲歸亦不妨

久雨

河東早秋風已涼 况乃陰雨難禁當 客子衝泥出門望
蓬蒿滿徑如人長 翻飛紫燕不妨濕 婀娜黃花今漸香
歸來獨酌對山色 圓笠依然戴石郎

強仕 三首

仕字甫登 無錫人 嘉靖辛卯舉人 選授江西廣

昌知縣 遷知德州 有考槃寤歌綺膳集

咏向長

子平謝累辟 雅志在隱居 乏食或有饋 取足反其餘 讀
易深自悟 人世等蘧廬 謂貧富不及 謂賤貴不如 勅言
婚嫁畢 家事無關 余同好有禽生 肆意相與娛 五嶽游
躅徧高風 映簡書

咏王霸

儒仲有清節始亦赴徵命造廷抗高辭不肯臣萬乘歸
來事躬耕蓬藿掩門逕翩翩故人子相過容服盛一念
兒曹羞客去臥不應賴有賢婦言不失初守正嘉遯遂
終身清輝兩相映

咏梁鴻

伯鸞古賢人乃在杵臼間夫婦共守志逃名入深山淒
涼五噫歌東出辭帝闈齊魯復荆吳長往遂不還為傭
豈無勞顧已少外患終葬烈士旁高風邈難攀

劉成穆一首

成穆一名嘉壽字玄倩又字文孫崇慶人嘉靖

辛卯舉人有劉玄倩集

朱秉器云玄倩詩文初不經意即席揮灑頗有佳者

詩話孝廉過漢武帝陵詩云歲暮霜殘過漢都武皇陵墓舊荒蕪不將玉匣藏天馬猶仗金燈照野狐賦客詞園清露盡仙翁丹竈白雲孤千年唯有秋風曲渭水長流啼夜鳥楊用修見而心愛之然按其字句尚欠帖妥故置不錄

城南送友

送汝歸南國燕山正早秋獨傷千里別同憶五陵游漢
殿相如賦吳江范蠡舟相思同易水日夜自悠悠

高應冕四首

應冕字文中仁和人嘉靖甲午舉人官光州知

州有光州詩選

顧玄言云文中材致清臆聲調道拔平平寫出亦自沉淨

江上行

白日江上沒江雲滿滄洲鷗鳥各隨群煙波何悠悠還

將不繫心送君千里舟相思不相見極目令人愁

同張玄洲胡圓洲王曉山張元洲項芳溪江樓觀

潮分韻

江聲秋益壯江艸秋還歇夫差自亡吳子胥何怒越盤
盤江上山盈盈江頭月此景亘千古不逐浮雲沒

江村晚眺

荒村沉夕照煙樹幾人家野渡迎潮急寒山帶月斜漁
歸無遠市鴈下有平沙寂寂秋江晚芙蓉自落花

渡湘江有感

扁舟復何去五月下瀟湘遙望蒼梧迥還憐楚水長暮
潮下野渡遠樹帶殘陽渺渺雲山外蒼茫隔故鄉

陳芹 三首

芹字子野系出交南國王永樂中避黎氏之亂
來奔遂家南京中嘉靖甲午舉人六試禮部不
第謁選知奉新縣調簡得寧鄉之官九十日謝

病歸結青溪社有陳子野集

錢受之云子野才情警敏
醉墨寫竹枝歌斜盡致文

徵仲戒門下士往南京慎勿画竹彼中有人也少嘗夢入深山石梁跨
道瀑布灑空洞中二老僧趺坐周繞木闌以防虎後遊天台山洞宛如
夢中未闌猶在問之土人云老僧化去久矣自是恍然省悟專精內典
作和寒山子詩別業近新林浦是謝元暉題詩處又於桃葉淮清之間
起邀笛閣延一時勝流結青溪社每月為集過景命題即席分韻金陵
文酒觴咏之席於斯為盛相延五十年流風未艾承平盛事至今人豔
稱之長年市兒
猶能指點其處
詩話虞山錢氏序金陵社集詩云海宇承平陪京佳麗仕宦者跨為仙
都游談者指為樂土弘正之間顧華玉王欽佩以文章立壇陳大聲徐
子仁以詞曲擅場江山妍淑士女清華才俊歛集風流弘長嘉靖中年
朱子价何元朗為寓公金在衛盛仲交為地主皇甫子循黃淳父之流

為旅人相與授簡分題徵歌選勝秦淮一曲煙水競其風華桃葉諸姬
 梅柳滋其妍翠此金陵之初盛也萬曆初年陳寧鄉片解組石城卜居
 笛步置驛邀賓復修青溪之社於是在衡仲交以舊老而蒞盟幼于百
 穀以勝流而至此歟後軒車紛逐唱和頻煩雖詞章未濶大雅而盤游
 無已太康此金陵之再盛也其後二十餘年聞人曹學佺能始廻翔棘
 寺游宴冶城賓朋過從名勝延眺縉紳則臧晉叔陳德遠為舊日布衣
 則吳非熊吳允兆柳陳父盛太古為領袖臺城懷古爰為德弔之篇新
 亭送客亦有傷離之作筆墨橫飛篇帙騰涌此金陵之極盛也戊子中
 秋余以銀璫隙日采詩舊京得金陵社集詩一編蓋曹氏門客所撰集
 也嗟夫日中月滿物換星移舟壺夜趨飲獵旦改白門有烏無樹枝之
 可統華表歸鶴張城郭之併非撰文懷人吁其悲矣謂我何求亦無費
 焉覽其文者謂淋漓盡致感哀今昔之感具於是矣然錢氏所求亦無費
 其詳青溪社集倡自隆慶辛未而非萬曆初年也朱乘器停雲小志云
 青溪自後湖分流與秦淮合當桃葉淮清之間有邀笛步者晉王徽之
 邀桓伊吹笛處也陳明府芹即其地為習焉俯瞰溪流頗有幽致歲辛
 未費參軍懋謙約余為詩會其上於是地主則明府次則唐太學資賢
 姚典客湖胡民部世祥華廣文復初鐘參軍偉黃參軍喬棟周山人才
 甫盛貢士時泰任參軍夢榛先後游而木入會者則張太學獻翼金山
 人鸞黃山人孔昭梅文學鼎祚莫山人公遠王山人寅黃進士雲龍夏
 山人曰瑚紀亳州振東陳將軍經翰汪山人顯節汪文學道貫道會沈
 太史懋學程文學應魁周文學時復癸酉復為續會則吳文學于玉瑰
 廣文學禮莫貢士是龍邵太學應魁張文學文柱每月為集遇景命題
 即席分韻同心投分樂志忘形間事校評期臻雅道前會錄詩若干刻
 之命曰青溪社稿許石城先生敘其首續會錄詩若干吳瑞穀序之會
 余領諭郡符任參軍入與都稿遂散後方民部沆葉山人之芳入焉
 余馳書社中期稍收輯無何胡民部費參軍以謫謫黃參軍以領郡
 行已方戶部亦因事出會不常良朋星散回首江東雲樹在望秦淮
 煙月黯爾銷魂因記舊游略次其姓氏篇什如左按此青溪社集之本
 末始備錢氏止觀曹氏門客
 撰本而未見乘器小志故也

折欄會和周銀臺韻

新歲詩家集深更興未闌共憐今夜月仍似去年看社
 主歡扳轄車徒怨折欄綵梅紅對酒忘却外邊寒

秦淮煙月

秦淮煙暝水長流明月空懸萬古愁春去秋來風景別
 鳴箏夜夜酒家樓

聞笛有懷朱比部

空林寂寞雨絲絲
折得梅花未滿枝
正值鄰家夜吹笛
倚闌無限故人思

王 鑛 二首

鑛字公范閩縣人嘉靖甲午舉人官思明府同知有治山拙橐

送大行謝驛梅使琉球

使節分星象仙舟捧御函
絲綸宣海嶽天地極東南
服荷殊宣賜才推絕域堪
遠人胥樂附異俗乃能諳
父老相如檄詩書陸賈談
徵牢宵踰十館穀日過三牛馬
風何隔金銀氣不貪兩階遐
格舜九扈乍聞郊專對名非
忝周咨迹豈慚歸航應載石
赴闕及傳柑國體從茲振
兵威不自戡梅花洋信近
延竚慰朋簪

青魚灘

青魚灘上野人家
曲徑疎籬長物華
漠漠午煙吹不散
鷓鴣飛出木棉花

薛 欽 二首

欽字寅甫懷安人嘉靖甲午舉人太平儒學教諭有東山集

句容道中望茅山

詩話薛君詩頗清越近於晉山樵者曹能始序徐惟和詩云聞自林膳部後百餘年而得鄭考功又數十年而得薛博士其推重若是

翠嶽盤江甸遙天紫翠分
風塵應不到鸞鶴自為羣
曉徑連青靄秋山徧白雲
可憐句曲望不見華陽君

雞鳴寺

古寺浮仙嶂層甍近帝家洞香流石乳僧午飯胡麻金
刹盤飛鶴丹池聚浴鴉俄聞孤磬發蕭颯滿煙霞

郁蘭一首

蘭字文芳秀水人嘉靖甲午舉人官南京刑部
主事有比部橐

詩話嘉靖倭亂胡總制宗憲有捍患功及被逮繫陽川時知績溪縣事
力覆護之至以去就爭願上印綬始得免羅織可謂長者今無曲之士
知其名者寡矣矧詩乎

讀五代史

天地沉冥際山河戰伐中可憐長樂老只是愛三公

吳節一首

節字子甘江陰人嘉靖甲午舉人任江西新昌

知縣

登仙臯亭

仙臯孤亭敞憑高發興新風帆斜入浦雲樹曲通津丹
井迷芳艸清池覆綠蘋月明歸去近涼影忽隨人

陳紹文一首

紹文南海人嘉靖丁酉舉人官通判

幾日南巡詔旋看下九霄五花邊將馬七葉禁臣貂帝
子馳金輅神人駕石橋康衢應有頌誰為采風謠

吳旦一首

旦字而待南海人嘉靖丁酉舉人謁選為知州

有蘭皋集

詩話蘭皋南園後五先生之一也惜其集不傳

秋夕城闈納涼

同游冠蓋晚相招澤國山川正
次寥官閣迥臨秦代壘
女墻斜帶越江潮流螢艸細
風先動繞鵲枝長露易飄
多少高樓人不寐碧天涼
月夜吹簫

蔡宗堯 一首

宗堯臨海人自號東郭子嘉靖丁酉舉人選授
松陵教諭有龜陵集

麗情曲

曲房過雨蕙徑空綠雲藹藹懷春風
欹枕牙床睡初醒

臙脂汗濕羅衣紅鴛鴦牽繡絲未歇
流蘇夜煖斜明月
珠簾半卷春日高海棠飛起雙蝴蝶
鍾廣漢云八義遺響

方效 一首

效字去病桐城人嘉靖丁酉舉人有石洲集

歸途

大龍之嶺高插天石塘湖邊秋可憐
稻花菊花裛寒露
遠壑近壑屯晴煙江聲激壯自今古
峽徑縈紆還歲年
悠然獨馬渡河去日暮滄洲停客船

郭文涓 二首

文涓字穉源古田人嘉靖丁酉舉人官保寧同
知有亭集

遊西山

緬維京國遊夙憶西山勝前期戒朋儕昧爽理征鐙連
鑣出都門散轡遵郊徑足猶望晴巒迢遞陟煙磴蒼茫
紫翠分參差金碧映雲際鬱層臺風中發孤磬山光足
怡愉池色湛清澗覺花粲奇馨慧艸紛延亘梵影空中
懸經聲榻前聽行恐苔痕穿嘯聞谷響應翠巘屢攀躋
朱闌恒眺凭取適情易酬息機意初稱登臨愜賞懷攬
結動幽興聊茲却喧囂庶以慰蹭蹬

夜懷

疎燈孤館寂落木萬山空夜色誰家月秋聲何樹風鄉
園歸鴈外身世轉蓬中祇益離羣意淒然思不窮

劉

熠一首

熠字元麗號東沙海鹽人嘉靖庚子舉人官監
察御史有同春堂遺藁

山中風雨

春來風雨倍淒淒咫尺雲峰萬木迷竈下濕煙離突起
庭前幽艸上堦齊夢來旅况殊鄉國聽去江城盡鼓鼙
縱擬單車待明發子規聲已遍前溪

方興邦一首

興邦字懋翼莆田人嘉靖庚子舉人官至廣西
叅議有商村集

得子相書

尺素中宵慰索居美人南國意何如江淮殺氣昏牛斗
豺虎烽煙蹙羽書天入蒹葭孤鴈盡秋來風雨五陵疎
朱門鳴瑟誰知己莫漫逢人賦子虛

許邦才

五首

邦才字殿卿歷城人嘉靖癸卯舉省試第一任

永寧知州遷德府長史有海右梁園二集

魯藩中立云空

石詩傲于鱗而氣格不逮然于鱗詩多客氣而空石溫厚或過之謝
茂秦云殿卿軒軒豪舉傍若無人宋轅文云于鱗亟稱殿卿其梁園
集殊不稱絕

句差快意

詩話殿卿如銳頭年少騁獵平原耳後生風鼻頭出火長歌有云長卿
慕人千載前何似與君俱少年子雲慕不千載後何似與君俱白首爽
氣殊倫令張正言為之不過此也王元美贈詩云是時歷下李攀龍往
往道汝文章伯乃危言評詩竟不之及又夷之四十子之列取舍似未
也

寄懷元美

鴻鴈驚秋海上還片雲孤月薊門關如何昨夜西窗夢
不道千山與萬山

送高都護入賀

將軍白馬插雕弧自傍屬車誇射鳥陛下聖明三萬歲
微臣直至執金吾

送謝中丞歸射洪

二首

六月江干冰雪涼射洪春酒鬱金香自從筇竹通西夏
漢使年年出夜郎

巫峽江陵一水分猿聲兩岸夜成羣遙知月下孤臣淚
才過三聲不可聞

留別劉公

秋風長鋏幸生還
明日孤臣入楚關
莫道三年人萬里
天涯消得幾重山

韓詩一首

詩字承志長洲人嘉靖癸卯舉人知永豐縣遷
雷州府同知有勗齋詩集

小齋即事

小齋寂歷似山居
池上逍遙與世疎
盡日不通門客刺
經春嬾報故人書
捎簷細竹含風響
繞榻輕雲過水虛
願得郡中無一事
十年不調更何如

戎來賓一首

來賓先名國振字孔塘鄞縣人嘉靖癸卯舉人
榜後更今名官南昌府通判

郊居即事

作吏才偏拙為園意頗深
風塵元畏路山水是知音
徑曲叢篁密堂虛澹月侵
平生甘放浪自合蚤抽簪

梁柱臣一首

柱臣字彥國廣州順德人嘉靖丙午舉人官灤
州知州入為刑部員外有梁彥國存橐

寄懷蘇雲谷逸士

吾鄉隱君子質素古人風
性豈琴書癖身將猿鶴同
捲簾山閣暮策杖海雲空
一別麻源谷相思桂樹叢

陳所有 一首

所有字彥冲莆田人嘉靖丙午舉人合浦知縣

艸堂

艸堂在西林露頂避溽暑客來剝啄聲葛巾不知處

孫樓 一首

樓字子虛嘗熟人嘉靖丙午舉人湖州推官有

百川集

郊西詩

上苑春偏麗西郊更可憐輕塵花半妥斜陌柳初眠綠
樹鶯聲外青山馬首前夕陽南北定彷彿太湖田


邵圭潔 一首

圭潔字伯如一字茂齊嘗熟人嘉靖己酉舉人
有北虞集

蘇臺竹枝詞

魚尾晴霞片片明鴨頭新水半塘生平川蕩槩一十里
深巷賣花三五聲

黃尚質 二首

尚質號  餘姚人嘉靖己酉舉人知息縣事

遷知景州有青園錄

再過半山堂

春風重過半山堂依舊千峰入坐蒼更有好花明後院
旋添新竹蔭虛廊畫圖想像暮雲谷詩句糝糊認雨墻

却怪山禽似相識向余啼上臥龍岡

采茶女

結束烏椎髻攜筐去采茶歸逢鄰女笑也插杜鵑花

葉春及

春及字化甫歸善人嘉靖壬子舉人選授福清

儒學教諭陞惠安知縣遷興國知州轉鄖陽同

知召為戶部郎中有網齋集

評語歐陽永叔日本刀歌云徐福行時書未焚逸書百篇今尚存令嚴不許傳中國舉世無人識古文永叔雖有是言亦詩人托興而已故葉少蘊馬翔仲均疑之鄭麟趾高麗史宣宗八年五月李資義還自宋奏云帝聞吾國書籍多好本命館伴書所求書目錄授之且曰雖有卷第不足者亦須傳寫附來日錄首開百篇尚書而高麗未之有也先是咸平中日本僧奝然以鄭康成注孝經來獻不言有尚書王暉中堂事紀載中統二年高麗世子植來朝宴於中書省問曰傳聞汝邦有古文尚書答曰與中國書不殊然則百篇尚書高麗且無之况日本乎萬曆初

網齋在郎署有命遣使臣封倭網齋上言請多方索之以歸未免近於迂矣網齋令惠安幾與姑臧葉蕪比潔有繡衣按郡經縣治騎從過盛將止宿焉網齋前曰口未吁惠安小縣豈容駐節乎強之去強項甚矣及解組歸隱居羅浮之石洞吟詠自適雖以講學聞詩宗杜陵不墮程

飲陳吳御宅即席賦得帝字

黃公避秦皇子陵傲漢帝萬乘彼不榮五斗吾何利邇來脫桎梏麩蘖聊避世田父尚不辭况乃夙同志高堂敞華筵上客縱橫至日暮飲未休舍坐還席地屢舞倩人扶懽言答賓戲因思劉參軍荷鍤有深意

飛雲頂

峰到飛雲絕晴看赤日沉露凝霜鬢白龍起二儀深積氣連吳楚啼猿自古今天門知不遠乘興欲登臨

小砢石臺

倚劔孤城暮登臨萬壑秋潮平沙岸失月落島煙浮白
鹿通夸國黃雲滿戍樓南征斷消息橫吹不勝愁

訪詹咫亭先生巢雲書院兼呈社中諸友

二首

巢雲高不極飛閣倚雲開樹杪滄溟盡尊前紫翠來江
湖雙涕淚天地此樓臺縱有終焉計能忘國士才
惆悵出門去徘徊流水聞菊花深復泛桂樹晚重攀返
照孤城斂寒雲大壑還明朝羈物役清夢到柴關

白雲洞口號

二首

洞晚雲隨入巖秋雨自飛莫愁霑野席猶得浣塵衣歲
月吾將老煙霞興不違昔年招隱處叢桂可同歸

古洞何年闢長留宿白雲江山千里盡風雨半天聞芝
朮堪時往壺觴到夜分依依乘月去猿鶴惜離羣

初春滕方伯支學憲招飲藥洲藥洲南漢離宮有
池今名白蓮池畔有九曜石

留客平原飲賢哉二大夫致身霄漢近傾蓋古今無冀
北空良驥關西得舊儒偶然山澤叟今夕一尊俱

張鳴鳳

一首

鳴鳳字羽王豐城人嘉靖壬子舉人選授府通
判

留別黃門周公

清時落拓媿無能何事高人獨見稱朝議遽寬重譴吏

聖恩因借六安丞雲山曙色催行李秋渚離心醉采菱
夢裏亦知雙闕路幾回深夜悵殘燈

陳師一首

師字思貞錢塘人嘉靖壬子舉人有復生子橐

潞河舟中作

夾岸垂楊青可憐出門仍是葛衣天鄉書不到東吳鴈
客夢重尋潞水船季子貂裘重那敝王喬鳧舄幾時旋
年來作客渾南北囊底曾無貫酒錢

吳景明一首

景明字復陽休寧人嘉靖壬子舉人知州有西

洲集

赴西州任道中即事

灘險飛流急林深毒霧遮溪行朝避蜮山宿夜妨蛇屋
帟枕榔樹籬編茉莉花從知邊徼地風土異中華

姚光虞一首

光虞南海人嘉靖乙卯舉人官至知府

送周國雍守順慶

使君千騎擁朱幡此去誰云蜀道難列郡分符虞岳牧
前驅負弩漢衣冠湓城月色揚舲渡巫峽濤聲倚劔看
行矣外臺今不薄循良卿相滿長安

鄧元錫六首

元錫字汝極建昌新城人嘉靖乙卯舉人徵授

翰林院待詔學者私謚文統先生有潛學橐

擬古

人皆願延年延年欲奚為一夕復一朝忽與百歲期誰能繫西日長挂扶桑枝羣流赴巨壑寧復有還時劉安將雞犬八公徒愕貽秦皇與漢武但為方士嗤

雜言別傅陳二友

羲娥無停轂青陽忽朱明柔條奮翹柯原隰何青青往者日以徂來者日以榮嗟余至寡劣晞聖徒有營邁往信不力逾覺時序傾我身所以立豈不恃友生奈何同心侶中道各有程戚戚增紆思薄言寄深情

古詩送王子仁

噓物寧非風風勁物乃戕駕車寧非馬馬疾車以僵百獸伏騶虞衆禽景鸞鳳豈無鷹隼姿搏鷲難為良

別江子

良農程歲功豐凶非所諳良賈經儲積利鈍皆所甘曾以水旱故棄捐任與負曾以貿易薄棄捐絲與布十年經世業料理亦有素奈何乘輶輶中遠思改鷺人生各有職治職各以勤永誦蟋蟀篇愾然念先民

初夏登眺天峰

江城開宿雨孤嶠共躋攀龍氣留蒼壁鶯聲響碧灣危峰斜帶郭幽徑曲盤山不淺東林興迢遙未忍還

途中雜詩

河水走平土郡邑何偏側君莫問河防河防無上策

周式南一首

式南字仲翰吳江人嘉靖戊午舉人以孫宗建
貴贈太僕寺卿

萬松巖

為愛山幽選勝來城南絕巘翠屏開澗邊黃葉自秋色
門外落花空古臺松影半分禪榻靜潮聲一道海門回
聖朝欣覩平夷頌欲賦長楊媿不才

劉魁一首

魁字煥吾泰和人由舉人選授寶慶通判移知
金州遷潮州府同知入為工部員外郎諫徙雷

壇廷杖繫詔獄者再以宮禁火赦還有晴川集

詩話永陵好道詔徙雷壇於禁中曰雷霆洪應之殿有壇有城有轟雷
軒有嘯風噓雪靈雨耀電之室有清一齋有寶淵門有靈安精馨輔國
演妙之堂有八聖居有馭仙次各懸以額又別建凝道雷軒帝晝日常
御之其始作也晴川疏請停止帝怒予杖繫獄與楊伯脩周順之講學
因園中是年八月西苑神降于此請宥三臣乃得釋俄復逮繫明年宮
禁火放還晴川陽明弟子也郡人鄉公元標合三人詩刊之題曰三忠
選文

過德州次訥溪韻寄斛山

纔過滄州又德州綠楊堤岸菊花秋未論秦楚萬餘里
且共風波一葉舟農圃漁樵俱是侶江湖廊廟敢忘憂
獨憐胥脚差還健有約同登華岳遊

張燾四首

燾字水波南昌人由舉人仕至府同知有崇古

堂臺

先鋒樓

噫唳哉延城之山高兮天際頭况此城上更架百尺先
鋒樓登樓一望覽無際但見萬里蜃氣滾滾直與蒼天
浮三峰九溪不暇數時有倭雲刺日出沒亂我雙吟眸
憶昔使君提兵駐此地雄據八郡當襟喉生靈百萬賴
保障勞集不讓高密侯爾來兵力日綿薄肉食誰為天
王謀向來鄰郊有小警遂使五嶺欲撼杉關愁噫唳哉
粵山如昨粵水流壯士一去天悠悠東南徭獠尚可語
西北烽煙誠足憂去年胡馬下井陘遂使烽火通幽州
令人拊髀歎不已投筆每為班生羞安得使君溪前仗
劍起直走塞下一鼓甲士皆貔貅漠南河西羌種盡擊
滅從此玉門遣戍空防秋

秋思

二首

本朝宣大屹秦關北轉河戎部落間魏闕頻看優詔下
玉門誰唱凱歌還黃沙鼓角野狐嶺白日羊駝天馬山
節鉞不來楊石遠蚤秋烽火照愁顏
中原舊服緣河套百戰翻成縮內邊空使健兒遺白骨
不聞中帥給青錢六羸徑入榆林寨衆鴿橫飛好水川
安得征西班節使坐收氐海淨狼煙

康山忠臣廟

高王卷甲南征日掃蕩亡陳向北洲焚炬未應誇勝算

覆巢原已畫先籌江東父老空憐楚垓下山河盡屬劉
寂寞康山湖上廟至今煙雨不堪秋

李蔭一首

蔭字襲美內鄉人官刑部主事有五遊集

雪霽登雲門山

晴雲落澗春水鳴好風吹人衣袂輕有山如此不一醉
啼鳥可憐空數聲碧石崔嵬跨絕壑白雲爛熳連孤城
楚客興來每獨往浩歌不減昇天行

張邦伊一首

邦伊字孺覺鄆縣人以父時徹廕仕至陝西苑
馬少卿

沈嘉則有三楚之遊席上得分字

春城斗酒惜離羣把袂高歌到夕曛地入衡廬三楚盡
天迴襄漢九江分停舟夜聽湘靈瑟倚閣朝寒鄂渚雲
知爾尚平家累淺逢人勝事好相聞

仲春龍一首

春龍字原仁秀水人以太學生選授文淵閣中
書舍人有九山樵子集

少年行

鏤金鞍子百花裝三尺流虹飲血光白日報仇官市上
青春調笑酒壚傍

潘緯一首

緯字仲文一字象安歙縣人入貲為武英殿中

書有養疴遊淮園居諸集仲房云仲文年少攻詩不甘嘗調雖羽翼方翔而風力厚負

閭門尋周公瑕王和仲所居不得

閭門九陌通車馬往來逢入郭尋舊識望閭迷舊踪空

停秋江棹漫聽寒山鐘相隔城闌裏煙雲凡幾重

項元淇一首

元淇字子瞻秀水人光祿署丞有少岳山人集

皇甫子循云子瞻古選冲逸五言典雅七言清婉

同陳白陽登閣

月宇臨清桂星筵拂絳河已投車轄飲兼倒接離歌砧
杵催秋急風煙向晚多春波門外路乘興數經過

周錫二首

錫字子純太倉人嘉靖中以薦授潮州府通判

有南游東山蒹葭得已諸集

詩話子純下筆不休間有合作相傳攝潮陽縣印巨寇楊三摠林大帥率黨千人駕三十艘壓境警報踵至子純徐曰鼠輩爾胡能為眾皆懼子純挾弓矢上馬引滿射三發三中的桴鼓應之擊走三摠擒大帥以歸縣境以寧洵豪士也

海豐道中

長夏苦于役炎風吹鼓鼙山深榕子落雨急鷓鴣啼野
渡從流下斜陽在竹西極知行路險愁殺嶺雲低

茅屋

茅屋自成趣况丁離亂中敲冰兩孺子曝背一衰翁客
至村醪薄樵歸樹葉空三江十萬戶安樂幾人同

吳門夜泊

谷口揚帆風正急野亭雲木雨霏霏晚來城郭維舟穩
老去湖山見面稀十里煙光開疊嶂兩崖樓閣帶斜暉
夜深欲傍寒山寺依舊鐘聲落翠微

吳承恩

七首

承恩字汝忠淮安山陽人長興縣丞有射陽先

生存藁

陳玉叔云汝忠緣情體物其辭微而顯其旨博而深淮自張文潛以後一人而已李本寧云汝忠與徐子與最善

往還倡和今按其集獨不類七子率自曾臆出之以彼其才
僅為縣丞以老一意獨行無所板援附麗豈不賢於人哉
詩話汝忠論詩謂近時學者徒欲謝朝華之已披而不知漱六藝
之芳潤縱詩溢縹囊難矣故其所作習氣悉除一時殆鮮其匹

對月

人言天上月中有姮娥居孤棲誰與共顧兔銀蟾蝓冰

曹大同

二首

大同字子貞南直隸通州人由歲貢生授光祿

寺署丞有玉芝樓集

秋日田居

屏居謝人徒朔風吹寒雨遠樹既盤紆滌雲亦交互愁
鷓戀故林隱豹諳長霧羃歷川光昏蒼茫野火聚耳日
暫無擾閒情託豪素拙訥罷干時賞心於此遇飛光忽
我適咄咄歲云暮眷言採三秀頽齡儻能駐

遊仙

有道百靈初無名萬物始九氣煉中和三元謝甲子化
昇隨感遷清越徹表裏玄圃御斑麟丹丘乘赤鯉左拍

浮丘肩右躡羨門趾山成數寸塵海無三尺水長嘯宇
宙外超然得不死

張循占一首

循占字元易蒲州人官光祿署正有嘉樹齋橐

軍城秋夜

寂寞軍城暮浮雲暗斗杓戍樓人未散絕塞馬仍驕夜
雨千門冷秋風萬木凋籌邊王相國金甲未應銷

錢元鼎一首

元鼎字實夫桐城人鴻臚寺丞

偶出

臥榻淹三伏肩輿出早秋青溪通小市香稻滿平疇有

輪不載土桂樹無根株紛紛黃金粟歲歲何由舒一閉
千萬年玉顏近何如相違不咫尺照我闌干隅一杯勸
爾酒爲我留須臾

富貴曲效溫飛卿體

燒燭迷妝閣春旗隔步廊兩眉京兆画三日令君香袿
窄芙蓉衩釵危翡翠梁羨他雙海燕先占鬱金堂

楊柳青

村旗誇酒蓮花白津鼓開帆楊柳青壯歲驚心頻客路
故鄉回首幾長亭春深水漲嘉魚味海近風多健鶴翎
誰向高樓橫玉笛落梅愁絕醉中聽

田園即事

大溪小溪雨已過前村後村花欲迷老翁打鼓保社裏
野客策杖官橋西黃鸝紫燕聲上下短柳長桑光陸離
山城春酒綠如染三百青錢誰爲攜

秋夕

竹火煎茶寺菱歌載酒航人間秋夕好第一是錢唐

東未齋陶師

牀頭社甕鶯兒熟江口春船石首來欲就吾師謀一醉
講壇何日杏花開

勾曲

紫雲朶朶象芙蓉直上青天度遠峰知是茅君騎虎過
石壇風亞萬株松

約過鄰舍忘機對水鷗已成迂嬾性身外更何求

沈堯龍 一首

堯龍字易之湖州人由貢生官鹽運司有列藝

集

丙寅誕日

年來蹤跡逐風塵忽感懸弧笑此身白髮有時還到我
青山何處不容人漢家鹽鐵錙銖重楚國旌旗日夜新
且與蘋洲亭上客一竿春水共垂綸

魏學禮 二首

學禮字季朗長洲人以歲貢選鎮江訓導擢國
子學正陞廣平同知時與劉鳳齊名合刻詩曰

比玉集

李時遠云季朗辭鋒甚銳當勝子威一籌

昭君怨

翠袖辭金殿青苔闕紫宮香寒羅帳曉春盡玉階空
明月琵琶曲驚塵朔漠風

一作豔態消衣上悲情落管中

君恩原未薄妾夢向

來同

贈黎仲子

伊人結客少年場芳艸長亭正夕陽忽見雙魚來萬里
始知尺素下三湘布衣然諾輕朱建冠蓋縱橫憶鄭莊
郢曲自來多白雪遲君早晚賦長揚

孟思一首

思濬縣人通判有龍川集

秋夜期友不至

西風散秋聲搖我庭間樹月寒艸露光山靜星河曙林
鳥相向啼昆蟲紛若語美人期不來幽客徒凝佇

周沛三首

沛字允大紹興山陰人有浮峰集

詩話周氏宗譜不言允大登仕籍而徐文長集有哀周鄭州沛二詩

別顧孝常

馬離鳴故羣人去懷心知憶昔邁君始意氣如連枝如
何倏離別旦夕殊歡悲滔滔斯世士孰與吾心期言念
古之人同心不同時同時復睽隔何用同時為

冬日

明言錄卷四
滯寧迫冬日山川掩重岡引領望郊邑遠樹鬱蒼蒼浮
雲馳白晝迅風激衣裳中野少逢人乃見鳴鴈翔我有
一束書因之以遠將其多至萬言其音悲且傷終以重
見辭翩翩各一方攬涕下長坂躊躇不能忘

紅羅女

山東之賊紅羅女用兵迅疾如風雨白蓮授術成妖精
能令照鏡生公卿海內承平日已久乍見干戈皆却走
驅馳費盡中丞心羽書未報收刁斗紅羅女爾非男子
身蛾眉粉黛當青春跨馬彎弓無可樂何用風塵來殺
人山間小民饑餓苦日辦官需夜猛虎貧賤那堪更亂
離慎勿橫行到吾土

張之象 二首

之象字月鹿一字玄超松江華亭人以太學生
入資選授浙江布政司經歷有剪綵翔鴻聽鶯
避暑題橋倚蘭擊轅佩劍林栖隱仙秀林新草

諸集

莫子良云玄超詩爾
雅冲澹興寄寥遠

春日遊燕子磯

古稱秉燭遊行樂恐迨暮策駕尋名山居然得真趣展
宇開霽旭熙陽斂昏霧雲錦被奇峰水鏡含芳樹眷茲
風日佳開觴藉蘭杜頗懷披襟友諸美難具晤流鶯稍
出谷飛花已盈路暢哉人境外屏跡遺世故勿為京洛
士緇塵染衣素

梅花落

玉樹飛花早金閨引恨長雪明難見影風急易聞香舞
處飄羅袖歌邊繞画梁歲華憔悴盡魂夢憶遼陽

楊文卿一首

文卿字子質鹽山人稷山知縣轉南京都察院
經歷有鷗海集

秋日送曾公子實卿之延書扇頭

車馬翩翩送客行離愁遽逐海雲生三杯籬落菊花節
一路蛩蟹豆葉聲荒艸濁河連古戍悲笳明月動山城
鯉庭趨後勞相報婚嫁如今累尚平

朱永年一首

永年字仲開儀真人官光山知縣有朱仲子集

李時遠云仲子
詩有曠達之趣

詠懷

南鄰競歌鐘北里吹笙竽我獨甘寂寞守此貧賤廬蓬
戶不掩葦簟瓢常晏如負郭住窮巷門無長者輿彈琴
發雅操誦詠詩與書安神在閨房澹泊思玄虛至人求
髣髴榮名非所須

丘雲霄 四首

雲霄字凌漢崇安人嘉靖十七年貢士選南京
國子典簿遷柳城知縣有止止齋集

詩話止山騷鸞作史解組歸田栖息武丘山中閉關講學嘗與其友夜
宿高明樓中夜有怪倚門作人語曰同遊不樂乎何臥之早也止山應

之曰我載晨而遊抱日而歌汝胡不吾和而同其樂何為昏暮而來也
怪應曰不能止山曰吾亦不能怪歎息而去可謂不惑不懼者已松陽
徐夢陽評其詩稱其雅澹勁古景真情得
要之不蹈襲前人異乎七子之派者也

溪月初出水

溪月初出水照我清夜堂沈憂不成寐跼步寒光飛
烏深夜號遶樹林煙蒼有懷空自知默默心摧傷

怨詩

江石如龜甲隱隱浮明沙不障東之水偏驚游子查游
子去鄉國長風吹斷霞斷霞只在天游子去無涯泠泠
秋已老飄蕩未還家

寒露同李洗松宿方塘書舍

露重憐今夕秋深試薄寒溪聲亂籬落月色動柴關菊

密欲藏徑花嬌故傍欄相看疑夢寐秉燭問更闌

江晚

帆勢迎風疾灘聲入暮誼漁燈出疎樹客路問前村野
鶴冲煙迥山花帶雨昏寒江何處宿幽思未堪論

施漸三首

漸字子羽無錫人歲貢生授海鹽縣丞有武陵

集

王元美云施子羽如寒鴉數點流水孤村惜其景物蕭條迫晚
意盡 俞汝成云子羽趣味悠深聲調雅雋在韋柳錢郎間
詩話子羽僅初舜咨與華子潛酬和時
號錫山四友三君皆非華敵子羽差優

贈人遊蘭亭赴陳山人約

靄靄深竹林林深阻修澗清川流其間懸崖俯可辨春
蘭日以芳風氣日以變君往對山人如逢昔人面

贈吳還

山人為客吳門久白髮蒙茸將被首興到青山不問家
笑來花肆常沽酒行路蕭然滿篋詩風流文采雅堪師
自言身是陶弘景說與世人誰得知

竹房

寂寂春窗下惟餘修竹陰忽聞人共語送客出深林

李才一首

才樂安人舜臣子官主簿

雲中寄周總戎

雲中日夕傳烽火萬里邊風羽檄催胡馬長驅光祿塞
漢兵不度白登臺三關鞞鼓秋何急七郡蒸黎日轉哀

試問漠南諸將士只今誰是出群才

嚴怡三首

怡字士和如臯人以貢為博平訓導有石溪集

擬古

采采南山桐十年成一琴製者豈不苦謂世有賞音持
以奉君子不與我同心擬鑄鍾子期家無雙南金

石人

高岸勢若崩上有誰家墓已無墳上土尚有墳前樹樹
下多行人車馬成廣路此地少豐艸幸免穴狐兔石獸
半埋沒碑版知何處往者盡如此來者永不悟石人不
解語空泣艸頭露

曲塘

土墻茅屋竹籬笆楊柳風高燕子斜可是曲塘人好事
家家屋角有桃花

李奎一首

奎字伯文錢塘人以布政司吏再考錦衣從事

有珠山集

彭子殷云珠山詩一以興象為宗篇多渾融句多藻緻讀之爽氣滿前

詩話伯文周旋沈青崖於獄中者以氣義聞詩特寄興也

採藥

山中宿雨過嶺上明霞赤荷鋤入南畦藥苗始堪摘黃
精種未鋤紫芝已盈尺隔水望茅茨還歸煮白石

明詩綜卷四十八

